

## **ASO TOFI, 16 SETEMA 2021**

*Na toe fa'aauau felafolafoaiga ma taualumaga a le Fono Aoao Faitulafono i le itula e 2:03 i le afiafi.*

**FOFOGA FETALAI:** Ou te faasilasila atu ua toe amatalia nei Taualumaga o le Fono Aoao Faitulafono.

E toe faafeiloai atu foi i le paia o le Palemene i lenei vaega o le aoauli, i le toe amatalia ai o le tatou Galuega ma Taualumaga o le tatou Fonotaga.

E talitonu ua palelupeaumai le aupolapola o le tauta o le fausa e ala i le taligasua ma le taumafataga o le aoauli. I lau Afioga i le Palemia, le sui Palemia ma le mamalu o le Maota. E tatou te faafetai ai lava le Atua i Lana foai, ua tali le sua ma tatou aai maua ai foi se isi malosi e faaauau ai.

E faataatiaese Taualumaga a le Fono Aoao, o lo o saunoa le sui usufono mo le itu palota o Salega Nu 1. Ua ou tapa le sui mamalu mo le faaauauina o lau saunoaga. Ma le faaaloalo.

**Afioga FEPULEAI FAASAVALU FAIMATA SUA:** E faafetai mo le avanoa lau Afioga i le Fofoga Fetalai. O lea ua saoialo le taligasua, i le Afioga i le Palemia, le Afioga i le sui Palemia ma le mamalu o le Kapeneta, aemaise le loaloa o le nofoatoo i sui mamalu. O le a faaauau se faamatalaga a le auauna mai le tapuaiga a si ou itumalo. E ui lava o lea ua talatalafulu le manu nai moeafusia, ae ou te talitonu o lea ua taoto i paga le faamoemoe sa feagai ma lo tatou atunuu. Aua le filitagaga o sui filifilia o le Maota fonu.

E momoli ai lau faafetai i si ou itumalo o Salega 1, mai lava i Fagafau ma Samata i tai, Samata i uta, Fogatuli ma Faiaai, malie afenoa lau tapuaiga si ou itumalo. Sa ou seu lava i le vateatea i lupe o le malama, ae sa e seu tapuai. O lenei ua ae le faatamasoaliiga ua tusi lou aao, ona ou manatua lea o le tala o le saunoaga a le Atua na fai i lona nuu o Isaraelu, ina ua fili se taitai. Fai mai le Atua ia Arona, “fa’i mai ni tootoo taitasi mai ituaiga o Isaraelu”. Ona tusi ai lea o le ituaiga, le igoa o le tootoo. A e vaai i le tootoo o Levi, tusi ai lou igoa.

Lou itumalo, na ou tatalo atu, na ou aioi atu i lau tofa ma lau faautautaga, manatua ane le igoa o Fepuleai e tusi i lou tootoo. Ua sii lou lima, aua e asi atu i le taeao, ua fuga le tootoo o Salega, ae o lo o tusia ai le igoa o Fepuleai Faasavalu Faimata Sua.

E mai lava i lea aso, e le itiiti le agaga faafetai e tupu ae, o ai ea lou faatauvaa? O ai ea au, le Atua ua e faamamaluina ai se tagata e sili ona faatauvaa e ala i lau musumusuga i lou itumalo.

E momoli lau faafetai tele i si ou nuu o Fagafau. E le faagaloina, sa ou savali, sa ou totogi le tau e tataua ona ou afu, sa tatou faafesagai. Sa e tali, ae ou faatalitali manogi i le lagi, se i to manu. Aua le afio o alo o Lilomaiava ia Seve ma Faga, Tuimaugapo ma le aiga, Sasoa ma le falefa o Samai, o lau pule lea.

Ou te faafetai foi, aua le tapuaiga a le sao ia Toomata, faafetai malo le fai o le faiva, e ala i lo ta afioaga. E i ai lou talitonuga, e taaalo lava tama a o le uso. O lou tulai mai i le foe mai lena Paeaiga, na ou matamata mai ai i fafo o le fale lenei tulou. O lou 500% na e tu ai i le foe o lo ta itumalo. E faafetai i lo ta afioaga i le lalago mai i sou vaivai, ma sou faatauvaa. Aua le afio o Toomata ma le toafa o alii, alalatai le matua ia Tuipea ma lou faleono. O le mamalu lava lea o sa Leutogi, se ua malo faafetai. E le galo afia i si ona vao.

Ua ou pale ua ou titi ua ou manogi, aisea? Aua le afio o le toatolu o alii, lau afioga i le tama tau Aana ia Faasavalu, Togagae ma Pupumai, le afioga i le matua ia Selu ma le faleupolu o tofiga e matua i tofiga ia sa Leutogi. Ua faafetai lalago mai, faafetai mo lau faatuatuaga, e faapei ona ou tu ai i ou luma i le aso o le sailiga manogi a le Vaega Faaupufai, ma ou faailo. Ou te lagonaina lou lagona, leaga na ou amata mai i se faleoo ma se molifagu. Ou te lagona ou lagona i le aso e tasi. O le faipule sa ola i le olaga mativa, e lagona i le toto. Ae paga lea, paga lea, talofa e, ua le agi mai le sau mai le aga o le sa'u. Sau ia se tama ina alu e asi pe aisea, o le tali. Ua avea upu faapolokiki ma fefuliai ai o ma patua.

Afualo ma le aiga, lau fetalaiga Tuuafiafaimanu, e pei lava ina ou fai atu i le taimi ua sola ina ua tatou faafesagai, e leai se aso ma se taimi ta te faapea ai. O lo ta va ma le ta nonofo ma le ta tutu e le sao ai se suavai i le va. Ou te faapea atu i le aso lenei, faafetai i lau pule lea. Ua e to ai manu ma e tusi lou aao, o au lea ua ou sau, e fai ma ou fofoga, e fai ma ou leo, i upufai o Malo i Tiafau i le Maota fonofa. A afa pe timu, o a fesouaina, Fualau ma le aiga alii e te le nofononofo. Sua ma Gisa, lau afioga ia Fepuleai, Tilafono ma Faavaoga ma tama, Tuanaiia ma Leu, lau tausiga Tuisalega i lo ta itumalo, e te tu i le too. E mai lava i Mataiilimatapapa seia paia Fetoloai ma Vaimuliai, e te savali lava e te vaai. O lenei ua ou tulai atu, afai ua e silasila mai i sou vaivai, e le o se tofi e na o Fepuleai. O le ta tofi, o lau tatalo, tau ane lou igoa pe a e tulivae i le ao ma le po.

Ona faapai lea o sau tala ma sau faafetai, i nai ou uso sa matou o i le faiga filifiliga. Lau afioga i le sao Toomata Aki Tuipea, faafetai mo fautuaga, faafetai i lau upu timai. E te malolo faatamalii. Le afioga ia Afualo, o a taimi na ta fefulituaai ai, e mamafa le toto i lo le ipuvai. Ua uma ona ta faalelei, sau ia ou te manaomia lou aao ma lou tauau, sei o ta tauamo faatasi le avega e mamafa. Ou te le mafaia na o au, seia vagana le Agaga o le Atua e fesoasoani mai.

Leaumuaava faafetai, faafetai i lau faautaga malamalama, ua e saunoa ma e fetalai i lo ta va nonofo, e lafalafa lava tuna o taua o le uso.

E faafetai i lau susuga le toeaina, faafetai i a lua susuga i tausi Matagaluega, faafetai Fesoasoani Katoliko ma Epikopo aemaise o faafeagaiga taulagi a ekalesia Penetekoso ma le ekalesia Aso Fitu i totonu o lou itumalo, faafetai tapuai. O ou faiva alofiaao ua manuia ai faiva o lo ta itumalo, ae a sailiga manogi a le tatou Vaega Faaupufai, o nei ua le toe i ai se FAST, o le malo mo Samoa ma ona tagata lautele. E viia le Atua i tapenaga ma mea uma.

Ona oo mai lea o sau tala, e faafetai i nai ou aiga. Seve ma le aiga, Fepuleai ma le aiga, Faasavalu ma lau feagaiga ia Selu ma o ta aiga. Nai ou aiga Sua i Malaeta, ae a Aiono Suamataia i Lepapa. A o se tapuaiga a le aiga o si ou toalua o faafofoga mai, faafetai. E faafetai tatalo, faafetai i taulaga soifua a ou aiga, sa outou tau lou aiga.

E faafetai i si ou tama faaleagaga ia Pou Tuigamala ma le faletua ia Tusi, paia i le ekalesia i la outou tuualalo. O lenei ua liu tagata lau tatalo, e mafua ai ona ou tutu atu. Ua faamamalu e le Atua se tagata e sili ona vaivai. O le aso lenei, ua matou faamavae ai ma se tasi o tina o lenei aiga i le valaau a le Atua. Ua le sili ae nai lo lou valaauga mai le Atua e ala i lou itumalo. E momoli atu alofaaga i nai ou aiga o feagai ma faanoanoaga, ona o le valaau paia a le Atua i le tina ia Mema i Saina i Faleata...

E momoli atu alofaaga i nai ou aiga o feagai ma faanoanoaga, ona o le valaau paia a le Atua i le tina ia Mema i Saina i Faleata. Ae talofa ua le vaai si ou tina ia te au. O lou tina o le loomatua pipili, sa faafailele mai i lenei vaivai, pe pipili le tina, a o le tina lava lea na aumai e le Atua, pe mativa pe faatauavaa, o le tina lava lea na aumai e le Atua ou te ola mai ai i le lalolagi lenei. Faafetai tina tausi mo au.

Faafetai, faafetai tele i lau Afioga i le Palemia, ua e talia Fepuleai i totonu o lau Vaega Faaupufai. E faafetai Laauli, faafetai Olo faafetai Leatinuu, sa outou fau i sou vaivai. Ou te le masani ou te tu faapenei. Ae ina ua fetaiiai Salega 1 ma Salega 2, o i ina na maua ai sou manatu. O le mea e te i ai ou te i ai, faafetai i lau fautuaga lau Afioga Olo Fiti.

Ona oo mai ai lea o se tala a Salega i le Tala o le Tupe. E momoli le faafetai a lenei itumalo i lau Afioga Mulipola Anarosa Ale Molioo, lau Afioga Leota Laki Lomositele i le tapenaga o lenei tapenaga tele. E le faigofie, e le faigofie i le matou matau atu. E faapei ona taua e nisi o sui usufono, na lagona le leo, na pao le po, o le a? E tatou te le iloa ona fau se Malo. Ae ina ua e faatalisau i le Atua i le Agaga, ua faagagana ai tamavalevale. Se i faaali le matautia o le Atua. O lea ua e lufilufi lima lelei, i lau faitau, faafetai tapena, faafetai i lau Matagaluega. E tou te manava lava i le 24 itula tou te le malolo, i le tapenaga o lenei tapenaga tele.

E faafetai mo le faamama avega o lea ua pau pasese o matou i Salafai. Ae i ai le mea la e tupu i le vaa po o luga o le uafu. Ua oo lava i le

tamaititi e 2 tausaga, 3 tausaga e faatau lava le pepa \$6. E le tataua ea ona o saoloto tamaiti ia e oo i le 5 tausaga, se i silasila ane i ai.

E faafetai ua pau le vai, aua e oo loa i le taimi o palota tupu loa mea ia. E faafetai mo le eletise ua faamama avega. E faafetai mo pasene ia ua aumai mo le afaigaluega i saofaga. E maua na taua e le isi sui usufono, ia e le tuua ai foi sou manatu. O le 8% lea na tufa, o le fesili a Salega 1, o fea le isi 4%. A fai ua toe faafoi i totonu, o le a le mea e le toe aumai ai ua lata le lotu tamaiti. O le a se mea e tua i ai le aufaisaofaga? Ae foliga mai e na o le tau mai e 8% ae nana le isi 4%, o le a le uiga o ia mea? Toe faaopoopo atu, aumai i fafo le 4% pe toe faatele mai foi. Toe faamaite atu le pulega a lau Matagaluega le Afioga i le Minisita o tupe. O le sau lava o lea Saina, loan le miliona, miliona. Ae a tolotolo atu o tatou tagata, e na o le tai \$200 tai \$1,000, o le a le faiga. A o tagata o lea e fai saofaga i totonu o le Malo o Samoa. Ae matau e matou, talofa i le aufaipisinisi. A fai atu talosaga ae le talia, ae a o mai lava le au Saina o atu tatope tua, o ta faalogo mai ua tai \$5 miliona ua ave i ai. Ae leai ni saofaga a Saina i totonu o le Malo o Samoa. Silasila ane i ai faamolemole.

O le isi itu, ia outou silasila faamolemole agai i lau Matagaluega, o lea ou te faitau atu, e \$11 miliona lea e aumai. O le a la outou pese na pese i tua i le taimi na outou taamilo i ai, o le 11 po o le 51? O fea le 40, aumai i luga, leaga o le upu la e fai. Ia tatou o, o la o le a tufa mai miliona. Ia faamalamalama mai po o fea le isi 40. E leaga ou te alu atu i Salafai i le 3 vaiaso talu ai. O la e pipii ai le ata o le Minisita o Tupe i lona itumalo. Ou te alu atu la, o la e uu e le isi toeaina le lima o le Minisita o Tupe, a o le ata o le Minisita. Ou fai atu, sole, o le a le mea e uu ai le lima. Ae fai mai, ua ou maua se Minisita aulelei, ua ou maua se sui usufono e sili ona alofa. Ou fai atu, na avatu sau tupe i le palota, ae fai mai, e leai, ou te le i palota ia Analosa. Ou fai atu, ae a? Fai mai o la o le a sau le Minisita e aumai lau miliona. Ua e faalogo la i tala la e fai i tua. O la e faatali mai tatou i le miliona.

O le tuualalo faamolemole, silasila ane i le itu lea. Fai mai le isi vaega i le itulau e 3 i lau Tala o le tupe, ua e faailoa mai, ua tele aitalafu ua oo i le piliona. Ae fai mai le loomatua o le aiga o le tiakono toeaina, winty winty. O le fesili lau Afioga i le Minisita o Tupe, o le a le tele o le piliona lea? O le a le lapoa o le piliona lea e i ai. Aua o lea e tau mai o le piliona, a o le a le tele o le piliona lea? O lea la ou te fesiligia atu ai lau Afioga i le Minisita ma le Matagaluega, faapau le 20% o auunaga lautele, toe totogi penisiona toe maua tupe a tagata e i ai manaoga tumau. Toe tufa a outou miliona, a o lea e oo le aitalafu a tatou i le piliona. O le a le faiga o lea mea, e faapefea ona matou malamalama? Se e pau a le upu na matou faalogo mai i ai, lea na faasao e le isi sui usufono o Salafai, ua tefisiti atoa le polokalame. O lona uiga ai o le ata foi lea o le a maua ai, faamolemole lau Afioga i le Minisita, ia silasila ane i si a tatou mea. Na fai mai le isi toeaina Savaii, se i fai pe umi.

Ona oo mai lea i le Minisita o Punaoa Faale-natura ma Siosiomaga. O lenei vaitau o le vaitau o lologa ma mafuie. Lau Afioga i le Palemia, o

lau afioga o lo o i ai le Minisita o le vaega lea, ia e alofa mai. Ua lua(2) nei tausaga, e fou le mea lea e tupu i le nuu lea o lou itumalo, o le nuu lea o Fogatuli. E le masani ona tafe le vai lea, ae a oo ina tafe le vai lea, e sau uma lava le vai i aiga ia e i autafa. Faamolemole pe le mafai ona i ai se masini e sua mai le oneone la e i totonu ae fai ni nai taligalu i autafa, talivai e puipuia mai ai lea vaega o le atunuu faamolemole lau afioga. E oo foi la i le auala lea e kolosi ai, ua le talafeagai mo lenei vaitaimi, ua fai si maualalo foi, pe le mafai ona sii ae i luga i sina 3 mita lau afioga i le Minisita o Galuega.

O turisi, e tasi lava le matafaga e sili ona tautaua i le itu atoa lea o Salafai na o le matafaga o Faiaai. A e oo i i, e pei lava ua e oo i le parataiso. E leai se vailaau e leai ni togafiti faasoifuaga nei, o fai i le ogasami lea o Faiaai. O le tele o turisi, faamolemole ua matou fiu e talosaga se vai e alu i lalo i i, a o ni nai fale e fesoasoani atu ai le tatou Matagaluega. Faamolemole lau Afioga, se i silasila ane i le vaega lea.

Lau Afioga i le sui Palemia, malo fai o le faiva, e fou i lau Matagaluega. Ae ou te talitonu o le ivitu lea o lo o maua mai ai tupe maua a lo tatou Malo. Se i toe silasila ane lava i lafoga a faifeau, aua ne i o tatou gagau tele i le tupe, o le a toe fao ai le mama mai fofoga o le aufaigaluega. E leaga o le mau a la matou ekalesia, o lau sefuluai e ave i le Atua, e ala i le aufaigaluega, ae o lea e foliga mai e ave le sefuluai ae toe fai mai foi le sefuluai a le Malo.

Lau Afioga i le sui Palemia, lau Afioga i le Minisita o Tupe Maua, silasila ane i le vaega lea. Ona oo mai lea i lau Afioga i le Minisita lava lea o Tupe maua, ua tapuni le tele o pisinisi, ae fai atu pe aisea? E leai se auala a lau Matagaluega e fai ni aoaoga i tua i pisinisi laiti i le faiga o le mea lea o le tax, faamalamalama i ai le faatulagaga o le tipiina mai o lafoga. O le mea lea e i ai, e na o le o atu lava o le aufaigaluega ao mai tupe, ae leai se taimi e nofo i lalo ma faamalamalama i le owner o le faleoloa, o le mea lea e aveese, o le mea lea e faapea faamolemole. O le tulaga lava tau pisinisi, e \$12,000 le tau o le masini lau Afioga i le Minisita, le masina foi lea e ave e tali ai tupe e \$12,000. Ou te le iloa se pisinisi tau amata i Samoa, seiloga e fai se loan e faatau ai le masini lea. E lelei le masina e ao ai tupe ae taugata mo matou i Salafai ma nuu i tua. Pe leai se isi auala e fai ai mo nai pisinisi laiti ia ae tuu masini mo faleoloa tetele, faamolemole lau afioga.

O le tele foi o faalavelave ia e tutupu, e mafua mai i le avamalosi. Lau afioga e maua o lau afioga lea e taitaifono o le avamalosi, se i silasila ane lava i pia ia e fai e le aufaifalepia. E pei o le au vaega ia le au, tulou o le upu e to ia te au. O lea e fai mai e fai e le au Saina, se i silasila ane lava po o talafeagai le malolosi o pia ia faamolemole lau afioga.

Le Minisita o Galuega, Laauliolemalietoa...

**FOFOGA FETALAI:** E toe 3 minute o le sui usufono

**Afioga FEPULEAI FAASAVALU FAIMATA SUA:** E \$140,437 poloketi mo faatoaga laiti, faamolemole lau afioga po o le a le faasoaga

o nei tupe. Pe lavea ai ma matou i Salafai e pei ona taua e se tasi o sui usufono, o nai maumaga laiti, foi ia i vailaau, nai fagavao ma mea faapena, ia oo atu i ai le tufa a lau afioga. O oe o lo o e tu i matagiolo e toe lalaga le ivitu o le atunuu, atunuu aua ana tupe maua ma le agai atu i luma.

Agai atu i tatou faigafaiva, lau Afioga o lea ua ou vaai atu ua e asiasi i Salafai, ia o le uafu foi lea o le vaafagota lea e i le matou itumalo, lea e i le itumalo o le Afioga i le Minisita o Tupe, o lea o le a ou faaleo atua leaga o le matou itumalo uma lava lea tau faa-faigafaiva. Sina uafu faapena pei o le uafu la e i Matautu e taula ai vaafagota ma faalautele le uafu faamolemole.

Si ou uso a sui usufono lau Afioga i le Minisita mo Galuega, tulou, lau Afioga Olo Fiti Vaai. Ia o lea ua e tu mai i le foe, uma lelei lea ua uma le isi 15 tausaga o e tulai, e leai ma se mea na faia i le ta itumalo, leaga sa e tu atu i i. O lau tatalo, manatua ane le ta itumalo.

Ou te le iloa i le faigamalo, e le i oo lava se auala galue a lenei nuu o Faiaai, e le i savali ai se masini. Faamolemole manatua ane Faiaai i lau lisi, e le i faia lava se auala galue i Faiaai o la e auala mutia lava. Ia e faapena le nuu lea o Siuvao le isi itu o Fagafau, e oo mai i le taimi lenei, o la e lau lava vai. E feinu Falelima feinu Fagafau ae le inu lava le nuu lea e i totonu i i. O le tali, aisea? E leai se vai ua oo atu i ai, e oo mai i le taimi lenei. Paga e, talofa e, a leai se penisini o taavale a le aiga, ona talitali lea i le lagi o se vai, leaga e mamao le nuu i o mai le aai. Lau Afioga i le Minisita, pe leai sina ofe foi lele pe 2 inisi e faaoo atu ai le vai ma sia vaega o le itumalo.

Ia, ona agai mai lea o le faamatalaga i le Minisita o Leipa. Leatinuu, ua vaai ma le faanoanoa le mea la e tupu i luga o le uafu i Salelologa, saofafai solo nai aiga e tau faatau le faguvai, faatau le tuisi. Silasila ane i fanua ia, aua o le Afioga ia Olo e vaai uafu, a o le Alamanuia ma Leipa, lau Afioga. Ia, silasila i nei eleele pe le ono faatu se faletele, o lale ua tu le fale o le au Saina. O lona uiga e mautinoa e tapuni uma lava pisinisi laiti a le au Salelologa, ia ma lea itu o le tatou atunuu. E le na o Salelologa lena e i ai, o la e foi e i ai tagata olou itumalo, faatau ai nai pepa lopa. Ia o mea na e ola ai matou i tua. Ia faamolemole lau Afioga e silasila ane i ai pe a tau ane ai lau faasoa.

Faafetai Valasi. Ua ou vaai ua e savali, ae faanoanoa e e faasilasila atu, o le falemai i Foailalo ma le falemai i Sataua ae tasi le taavale o le ambulance, tasi le taavale e faasoa ai. A e alofa ia tofi i ma le taavale. O lea foi na taua e se tasi o Minisita o le Soifua Maloloina mai Salafai ea malulu. Na ou asia i le isi tausaga lea na tea nei, na ou alu e ave lau quote i galuega, ae ou alu atu ai e leai se ea malulu i le potu la e i ai vai ma vailaau i Foailalo. Ae ou te faafetai, ua ou vaai ua e savali ai, ua e alaala i ai.

O le faafetai faapitoa, faafetai ua toe ola le tatou faata faapitoa i le falemai i Motootua. Valasi faamolemole, e fia manaomia foi e Tuasivi se faata faapena. Leaga e i ai nai mai o le matou itumalo na omai, e tuli

mai Motootua i le faata ae fai mai o la e leaga, ae faafetai o lea ua tulai mai.

Ia ona ou oo mai lea i lau Afioga i le Minisita o Leoleo, le ma Matagaluega. Malo onosai, malo toa. O fea lava e agai i ai fuafuaga ma lavasiga a le faigamalo, leaga o lo o i lalo i ou aao le Tulafono. Ua ou iloa foi, po o le a le vevesi o tagata, ae te faifaimalie lava i le Tulafono. O lau tatalo, lena e latalata ane i ou autafa le Minisita o Tupe. O le Matagaluega lenei o leoleo, ao ma le po, po ma le ao, e 24 itula e le moe i le tausiga o lo outou soifua e ala i le saogalemu. E 7 aso o le vaiaso e le oo le isi leoleo i lona aiga, auaunaga e alu ma le ola, ae le lelei totagi. E le maua ni ovataimi. Ia, a o sina alauni foi. E tatalo atu faamolemole. E mamao mai Palauli le pou lea a le Matagaluega a taua i o ae ua leai se pou i le matou itumalo faamolemole, silasila ane i ai.

Ia ona faaiu atu lea i le Matagaluega o Aoga. Seuula, faafetai. Ua 2 i le 3 tausaga o talosaga le matou faleaoga e leai se mea, ae o le a oo i le palota o le a fai, ae toe mimilo lava i ina le taavale ave lipea ai le faleaoga a le isi pito. E malamalama ai le Afioga ia Laki aua o ia sa nofo i le mea lea. Ou te le iloa la po o Leota Laki na mimiloa po o le vaega la e i ai na mimiloa. Ae faafetai ia Leota e alu ese ae faatoa ou iloa e le o ia. Silasila ane i le faleaoga o lenei nuu o Faiaai ua tuai, ia ma toe aumai tatou pisikoa pe afai o toe maua. O le lelei ia o pisikoa i aso ia, e ao ai le faitau a le tamaitiiti aoga ma lana nanu. Aua o le taimi lenei, ia, o lo o taumafai lava lau Matagaluega mo aoga.

O le isi vaega faamolemole Seuula, silasila ane i le vasega 13 lea ua ou faalogo i le tausaga lea na tea nei o le a aveese, pe le ono aafia ai le soifua aoaoina o fanau. E iu le tamaitiiti aoga i le iunivesite pe a aveese le 13, na o le 17 tausaga. A o le 19 tausaga lea e talia ai le sikolasipi i fafo, e tausaga atoa e nofo ai le tamaitiiti i Samoa seia atoa le 19 faatoa alu i fafo. Toe silasila ane i ai faamolemole.

O le tulaga i aoga tulagalua, e tele le galuega a Pule Aoga. O lea na faaalu i le tatou anavatau i aoga faataitai. Mai le vasega 1 e oo i le vasega 8, e 8 vasega e tauave e le Pule Aoga. O lau tuualalo, ae a pe a vavae e amata atu i le vasega 4, a o le vasega 3, 2, 1 agai i lalo, ma le 4-5 tausaga, faaese le isi vaega lea, aua o tama ia lea e ala ai ona o matua e ave tamaiti i le aoga. A o le vaega matutua, e mafai lava ona alu le tagata ia. Silasila ane faamolemole na ona tuu atu...

**FOFOGA FETALAI:** Ia, faaiu maia lau Afioga i le sui usufono mamalu.

**Afioga FEPULEAI FAASAVALU FAIMATA SUA:** Ia, ua maea foi le lauga. Lau Afioga i le Minisita o Aoga, lau Afioga i le Minisita o Faamasinoga, malo le lototele, faafetai faatoatoa aua le Matagaluega, aemaise lau Afioga i le vaaiga o le Faamasino Sili ma le Pulega o Faamasinoga. Pau lea o le lala o lo o tumaoti i le taimi lenei sa tua i ai le tatou atunuu. Toe silasila ane i Pili ia e tolu po o le a se tulaga o le a

oo i ai. Ia ma polokalame o Tulafono ina ia mafai ona faamalamalama lautele.

O le Ofisa o Faamasinoga i Tuasivi, o le pagatia ia o matou i le faaitu lea mai Salega ma Asau. A omai e oso i le pasi toe alu i le isi taavale i Tuasivi. E le o le taimi lenei e aumai ai loa i Salelologa ina ia maua faatasi e matou ma isi nuu ia le tasi o le pasi e oso ai?

Ia ua maea le manatu o lenei itumalo i le tatou Tala o le Tupe. Ona faapea lea o se faamatalaga, to manu aua le faatamasoaliiga i lenei tausag ama lenei Paeaiga. Faafetai i le Minisita o Tupe mo le tapenaga ma lau Sui Minisita. Ou te manatua ai le faamanuia a si ou tina ae le i maliu, a alu atu lou toalua e avatu i ai le meaai ae fai mai le faamanuia a le loomatua, “Ia toe maua se isi au faaipoipoga.” Mulipola, ia e manuia faapena.

Lau Afioga i le Fofoga Fetalai, ia maua sou finagalo aua le Fonousu a Samoa. Ia laumagamaga lau faatofalaiga, ma ia faatumu i luma aua le feagai ma le fonotaga a Samoa. Ia fuga lou tootoo e te tu ai i le foe, ma ia malosi lau meafaigaluega e ala i lou loto e te feagai ai ma tiga. Manuia le Matagaluega, manuia lau Afioga i le Minisita, manuia lau Afioga i le Palemia ma le vasega o Minisita o le Kapeneta. Manuia le tapuaiga a Samoa aemaise o tatou nuu, ma itumalo ma aiga. Pulega o lenei fale ma nei Matagaluega, Ofisa Sili o Pulega o Matagaluega ae ola Salega i le alofa o le Atua. Soifua.

*Na faaalua le agaga fiafia o le Maota i le patipati o latou aao i le maea ai o le Saunoaga Faa-Taupou a le sui usufono mo Salega 1.*

**FOFOGA FETALAI:** Ia, faafetai Salega le sui usufono mamalu. Faafetai mo le lauga, o lea lava ua saausi lava le saunoaga ma tuuavanoa atu foi le Nofoa ona e taua foi tulaga pei ona e laga. O le mea lea faafetai le tapena, malo foi le faamanatu i le tatou Faigamalo, aua lava le agai i luma o si o tatou atunuu. O le mea lea, malo faafetai, malo lauga.

Ia, o le avanoa lenei o se tasi foi o sui usufono aua lava le tatou Tala o le Tupe.

Ia, e matau atu o lea ua tulai mai le Afioga i le Tiakono Toeaina le sui usufono mamalu mai Gagaemauga Nu.2 le fetalaiga ia Seuamuli. Ia, lou avanoa lea e te saunoa ai. Ma le faaaloalo.

## SAUNOAGA FAA-TAUPOU

**Tofa SEUAMULI FASI TOMA (Gagaemauga 2):** Faafetai mo le avanoa lau Afioga i le Fofoga Fetalai. Ia malie ia i lou loto upu ma mafaufauga o lou loto le Alii e, o lou papa ma lou faaolataga, na te togiolaina au.

Lau Afioga i le Fofoga Fetalai ma le paia o lenei Palemene, o le Maota Fono lenei i Tiafau, o le Maota ua popo i ai paia ma mamalu o



Samoa. O le Maota fai mai e le toe faalialia ai se lupe e le fausia. E mafua i se a? Leaga e tu logologo. E muliai taumafai atu se lagona ma se sao o lenei itumalo e tusa ai ma le Tala Faatatau Autu o le Tupe lea ua faataatia nei i luma o le Laulau a Fono a le Palemene, ou te tulai lava ma le agaga faaaloalo, ou te tautala foi ma le faaeteete.

Ou te muai faapoipoi lilia ma ou sausuina paia o tiasa ma tiavavau o mamalu o Samoa, ma ou ofo alofa atu, faatalofa atu, faatulou atu i le paia maualuga o lenei Palemene, ae a le faafogafoga tapuai mai a Samoa.

Tulou ia le afio o lau Afioga i le Taitai o le Malo, lau Afioga i le Palemia, lau Afioga i le Sao Faapito lau Afioga Fiame Naomi Mataafa. Tulou le afio o lau Afioga i le Sui Palemia, lau Afioga Tuala Tevaga Iosefo Ponifasio. Tulou lau Afioga i le Fofoga Fetalai, lau Susuga i le Papaliitele Lio Taeu Masipau. Tulou le afio o a outou Afioga i alii ma tamaitai Minisita o le Kapeneta, afio a outou Afioga i sui usufono mamalu o le Palemene, tulou, tulou, tulou lava.

Susu lau Afioga i le Failautusi ma le Ofisa o le Fono Aoaofa Faitulafono. Susu a outou susuga i alii ma tamaitai Ofisa Sili o Pulega o Matagaluega eseese a le Malo faapea foi Faalapotopotoga Tumaoti. O paia ia ma mamalu lea ua aofaga potopoto i le Maota i Tiafau nei i lenei taeo na liugalua.

Ou te faatulou atu i le tapuaiga a Le Ao Mamalu i lau Afioga Tuimalealiifano Vaaletoa Sualauvi II ma lau Masiofo. Tulou lau Afioga i le Sui o le Fono a Sui Tofia lau Afioga Le Mamea Ropati Mualia ma le faletua. E faatulou atu i le tapuaiga a lau Afioga i le tama o le Tulafono lau Afioga i le Faamasino Sili, afio a outou afioga i alii ma tamaitai o le Faamasinoga Sili ma le Ofisa o le Faamasinoga.

Ou te faatulou atu i le ituvai o le talalelei i a outou susuga i taitai ma faaluuluga o Ekalesia Kerisiano i totonu o Samoa ma atunuu e mamao. Ae a le mamalu o le aufaigaluega tofofi o auauna faauuina a le Atua, o lo o faatunapaulia i afioaga ma alaafaga, o lo o faanonomanu aua se manuia o Samoa mo a taeo. Tulou, tulouna lava.

E faatulou atu i paia faaleaganuu, aua le paia o Aiga, Aiga o Tupu, Aiga o Nofo, Aiga o Ee, Aiga o Papa, o Aiga na Tafai, aua Aiga ma latou Tama, o Tama foi ma o latou Aiga, le Usoga ia Tumua ma Pule, Ituau ma Alataua, Aiga i le Tai ma le Vaa o Fonoti.

Ou te fia pai atu foi i le faafogafoga tapuai mai a nai o tatou uso i Sasae, aua le faigamalo a Tutuila ma Manua, i le afio o lau Afioga i le Kovana Sili ma le Lutena Kovana, afio le Fono Faitulafono i Maota e Lua, afio lau Afioga i le Peresetene ma le mamalu o le Maota maualuga. Afio lau Afioga i le Fofoga Fetalai ma le Maota o Sui, afio le Afioga i le Faamasino Sili ma le Ofisa o Faamasinoga. Ae le vaea ai foi le mamalu o le Ofisa o Mataupu tau Lotoifale aua le susu o lau susuga i le Failautusi, afio afioga i Kovana faaitumalo. O le paia lava lea aua le Faleagafulu ia Sua ma le Vaifanua, o Fofu ma Aitulagi, Ituau ma Alataua, Saole ma Saleaamua ma le Launiu na Saelua. Le nofo a sao o le tualauta ma maopu. Afio le Laau na Amotasi, le Faatuiolomoti

ma auvaa o Tootoo ma le mamalu i le Manuatele. O ou paia ia Samoa, o ou mamalu sausaugata ia Samoa i le amata mai i le matafanua i le taisamasama seia siuolefanua i Fili ma Puletuu lea na iite ai manu o Malo. Tulou, tulouna lava.

E le faagaloina lau faatalofa ma faafeiloai atu i le paia o si ou itumalo e apelepele i le loto Gagaemauga Nu.2. E ulufale mai i le Paeaiga talu ai i le 2016, o Gagaemauga Nu.3, ulufale mai i le Paeaiga lenei 2021, ua Ggaemauga Nu.2. E le mananao le matou itumalo i le Nu.2, e masani lava le itumalo lenei i le Nu.3. O le 3 mai lava i le 1962 i le 2015, leaga o tofiga ma vaevaega o itumalo, sa fefuliai faalaaui mamafa e o outou tuua ma o matou matua lea ua faailagi le folauga. I le ma lenei, o le Nu.3, o le numera e paia, leaga e paia le itumalo lenei. Leaga o le Atua le Tama, le Atua le Alo ma le Atua le Agaga Sa. O le mea lea i lau Afioga i le Palemia, toe aumai le matou 3, ae vaai ifo le itumalo lena sa tuu i ai le 2 e toe aumai i se isi taimi faamolemole. Le paia e i Aiga, Aiga Sa Peseta, i le afio o lau afioga Lemaveve Iuta, ua toe oe lau afioga o lo o seei mai i le itufale o le Sa Peseta, ua faalupe i le vao le nofo aua le Suafa Peseta i lau afioga Lilo, o lo o alaala i atunuu mamao lau Afioga i le Nofo Matua, lau Afioga Suisala. O le paia lea aua le afifio o le Aiga Sa Peseta, ua lo outou pale feagai ai ma le Afioga i le Maopu, aua le paia o le Aiga Sa Leota. Alaalatai le mamalu o le nofo a Usoalii le Faleiva, ma le aomamala ia te oe Matautu o le faamamaluga o Malo, o le malu o le fale Fagamalo.

Ae a lea itu o le Aiga Sa Peseta, le afifio o le paia o lo outou Aiga Sa Maiava, susu le paia o lo outou Aiga Sa Mataia, alaalatai lau Tofa Mauigoa o le Aitu Tagata ma le mamalu ia Satoalepai. O paia ia ma mamalu o le tatou itumalo i le amata mai Fanuatanu ma Asofaatau, o Mutiatele ma Matautu, Siliga ma Falefaamaoi seia paia Avao ma Tulaga ma Maloamata, ae matua lava le tuu i le tupua i fale Fagamalo ma le tupua i Fale Satoalepai o tua o Vaituutuu. O paia ia ma mamalu o le tatou itumalo, pe oo i ai sau tala pe le o o i ai, e le mafai ona aveesea ai ia paia ma ia mamalu.

Ua outou masani i lou leo, ua outou masani i lou leo. A faataalolo le itumalo faafaleaoga, tou te faafofoga i lou leo. A taalolo a tatou aoga faatulaga lua, tou te faafofoga i lou leo, a faataalolo foi pulega, tou te faafofoga foi i lou leo, e le fou. E momoli atu le agaga faafetai. Sa aumai la outou faaaloalo i le taimi muamua ou te tulai ai i le malae i Tiafau, le 2012 i le faamanatuina o le Iupeli Auro o le atunuu, lea ua toe aumai la outou faaaloalo 2021 i totonu o le Maota lenei e fai so outou sao aua faalagamaea a Samoa i ona upufai. Faafetai e tusa ai ma la outou faaaloalo, faafetai e tusa ai ma lo outou amanaia o sou vaivai, lea ua afe ane ma afe ifo, ua afe mai e ala i lau faiga filifiliga. Ua outou filifilia ai lou faatauavaa e fai ma outou sui i le saofaiga a le Palemene mo lenei Nofoaiga. Ua outou le filifili i se tamaoaiga, ua outou le filifili i se atamai po o se poto ua tele, ua outou le filifili i se aulelei Gagaemauga Nu.2, ua outou filifili i le loto.

Fai mai Samuelu ia Iese, “Iese, e filifili le tagata e vaai i le tino, a o le filifili a le Atua, e vaai i le loto.” Malo faafetai. Gagaemauga Nu.2 o lau pule lea. Tapuai maia ma le manuia.

Ona oo atu lea o sau faatalofa faapitoa i le aufaigaluega o le talalelei i totonu o si ou itumalo, lau Susuga i le Failautusi o le Pulega lau Susuga Kirisimasi Salaa Fiti ma le faletua ia Iloilo, EFKS i Avao. Lau Susuga Ali Alapati ma le faletua ia Fogalele, o le EFKS i Lelepa. Lau Susuga Tafale Tupuola ma le faletua ia Etevisa, o le EFKS o le falelua ia Satoalepai ma Safai. Lau Susuga Fao Stowers ma le faletua ia Faititili faafeagaiga a le AOG i Safai. Lau Susuga Salesa ma le faletua ia Malia, fesoasoani Katoliko i Safai. Lau Susuga Faimata Ioane ma le faletua ia Ualesi, o le tausī Matagaluega a le Ekalesia Metotisi i Avao. I lau Susuga Siaki ma le faletua ia Salu, faafeagaiga VOC i Saleia. Afio lau Afioga i le Peresetene o le Stake lau Tofa Tuipoloa Faamoetauloa Luki Fata. Susu lau Susuga i le Epikopo, lau susuga Tuipoloa Stock Betham o le Epikopo o le ualota i Fagamalo 1.

Susu lau susuga Lealaiauloto Vili ma le faletua, o le Epikopo o le ualota i Fagamalo II. Afio lau afioga i le pekiliaka ma le faletua, o le tatou Stake lau Tofa Lealaiauloto Faafetai.

E muliai sau faatalofa faafeiloai atu i nai ou matua faaleagaga lau Susuga Tauletoga Viliamu ma le faletua ia Sago. E momoli atu lau faafetai tele e tusa ai ma la outou tapuai tatalo. Sa outou tuu i le Atua le faamoemoe o le tatou Malo, o ai lava e fai lea mo tatou sui aua le tagatia a Samoa i ana upufai. Faafetai mo faamanuiaga, tatalo mai ma ia outou manatua mai au.

Ou te faatalofa atu foi i le faafogafoga tapuai mai a tama fanau, o tupu ma tamalii, faletua ma tausī, tama fanau a si ou itumalo o lo o alaala ma papaaao i atunuu mamao e pei o Niu Sila, Ausetalia, Amerika, Iapani, Hawaii aemaise o Amerika Samoa ma nisi atunuu o le lalolagi. Faafetai i lo outou agalelei, faafetai i lo outou aao mafola, faafetai i le saili malo.

E faapito augafa sau upu i le mafutaga a le tatou itumalo i Kuiniselani i Ausetalia, aemaise lava le aifilofilo ai o nai ou matua faaleagaga ua malolo manumalo, le Susuga ia Silevi Tauaifaiga ma le tina ia Mele. Ua lua faaelelea, ua outou mafatia le paia o le mafutaga, ua outou saili i le ao ma le po, o le po ma le ao. E mafua i se a? E mafua i le alofa. Ua ou inu malie, ua ou tofo i le loloto o faamanuiaga o le auauna a le Atua ua u mai le tua, ae faamanuia mai le tautua. Faafetai mo faamanuiaga Silevi ma Mele, faafetai le alofa. Faafetai i lo outou agalelei, faafetai le foai, faamanuia le Atua i lou aao mafola. Toe pau lava lenei, toe tasi lava si mea o lo o totoe, toe o le oo o le sui usufono i le itumalo, toe taumafai tasi mai.

Ia, ona oo mai lea o se tala mulimuli i si ou uso a tauva, i lau Tofa Nafai, lau Susuga Mataia, lau Tofa Valu Talaimanu Keti. Faafetai e tusa ai ma lou sao taua a o e seei mai i le Paeaiga talu ai, aua se leo o le tatou itumalo. O a ni galuega e le i maea, e le i faua Roma i se aso se tasi. Faafetai i lou finagalo malamalama i le taunuuga o le faiga filifilia

a lo tatou itumalo. O upu a le atunuu, e taaalo lava tama a o le uso. Ua filemu mea uma, malo mo le faautautaga mamao Nafai, faafetai le tofamamao Mataia, e moomia sou fesoasoani ma se lagolago mai o le tatou amo e tausoa faatasi.

Lau Afioga i le Fofoga Fetalai, ona oo atu lea o se leo o lenei itumalo i le Tala Faatatau Autu o le Tupe ua i luma nei o le Laulau a Fono. Lau Afioga i le Minisita o Tupe, ua fiu e saili se upu po o se lagona e momoli atu ai se lagona i lenei ituaso e tusa ai ma le Tala Faatatau o le Tupe. O se tala o le tupe a manaia, e faigofie. E faigofie ia te i matou e le lava tele le faapoopo o le tasi ma le tasi. O le Tala o le Tupe lenei, ua oo i le tagata o la e taoto mai tua, tagata e le mafai ona savali, e le mafai ona tu, o lea lava ua oo i ai le faasoa. Faamalo faafetai Mulipola. E le vivii atu ne i tatou faoa le viiga, ae foi i le Atua ona o lana auauna ua aumai. Ua sao ia te oe lau igoaipu, fiatau i le vasaloloa. Ua e tau le taua lelei ma iu ia te oe le tausinioga. Malo faafetai, faafetai foi i lau Afioga Leota Laki aua le Minisita Lagolago o Tupe. Malo le galulue, malo tauatai.

Ia, o nai manaoga o lenei itumalo. Lau Afioga i le Minisita o le Soifua Maloloina, lau Afioga Valasi, faamalo faafetai. Ua ou vaai atu ua alu lau asiasiga, ua soo Savaii soo Upolu, malo faafetai. O oe lava le Minisita pito sili ona paepae lea e i ai nei o le saofaga o Minisita o le Kapeneta. O le matuai e paepae lava. A o le mau a le isi fomai, po o le paepae o le aulelei, po o le paepae ua leai se toto ua sinasina lou soifua. Silasila ifo lau Afioga i le Minisita i le falemai i Vaipouli. O le falemai i Vaipouli, a e silasila i ai i totonu e te savali e selu ai lou ao, e feilafi atoa. Maimau le fale, ae na o le Aso Gafua lava e susu atu ai le fomai. Se i e silasila ane lau Afioga i le Minisita i lea itu. Ua mafatia le matou itumalo e totonu faauma le loan e \$80 ma ona tupu afe ae leai se mai o taoto ai. Na oo loa i le taimi o puipuga o le misela i le 2019, o atu loa le Malo toe tapena, toe vevesi atu nei i le Koviti-19 i le tausaga talu ai, toe o atu foi le Malo toe tapena. E ese le manaia o le falemai ma lona nofoaga, ae pau lava lenei, pei ona saunoa se isi o sui usufono i le aso ananafi, e le iloa po o i ai ni tevolo. A o lea ou te fai atu, e leai, e pau lava o le palaaai o tagata faigaluega. A o le nuu lenei, leai e kerisiano uma tagata. O le mea lea faamolemole lau Afioga i le Minisita se i silasila ne i le falemai lea i Vaipouli.

O le falemai i Safotu, e faamuamua le Malo ae faamuamua le soifua maloloina. Ae ou te tau atu i luma o le Atua la e silasila, talofa, talofa i le soifua maloloina o le matou motu i Savaii. E leaga e masani ona ou oo i ai. O moega e o i moega. O la e faitau e toalua (2) tagata i luga o le moega ae le iloa e na o le ma'i lava, e mafua mai i le leaga o moega. O le mea lea lau Afioga i le Minisita, silasila ae i vaega ia aemaise lava o wheelchair, e na o le tasi lava le wheelchair i le falemai i Safotu. A taunuu faatasi atu la ni tina se toalima (5) se toafa (4), e faapefea ona fai? O tulaga i fale e agai i ai, fale malolo. Ou sau toe faatau atu vailaau, e le aoga lo ta alu atu i lo ta aiga o la e lelei le siosiomaga, ae o ta alu atu i le falemai, o, e o atu e fia togafiti, ae o atu atili ai ona mamai

i le falemai. O le tala a le autausimai ma i latou o lo o galulue, e faaletonu le sapalai. Ae toetiiti lava interview atu le Ofisa Sili i po uma po uma. E le taua le saunoa ma nofonofu, savali. Valasi ua ou soo i Savaii i le vaiaso talu ai i le Aso Toonai, ua uma le fonu a sui o nuu sui tamaitai i le aso Faraile i Salelologa pulega a nuu. Na ou savali i taitai o ekalesia ona o le tui lava lea o le Koviti-19. Ae tasi le Matagaluega lea e totogia au, e na o le Matagaluega o Tina ma Tamaitai. A o galuega faafomai, o lea ua ou savali i ai. O le mea e pitosili ona mamafa i lou loto, pe oo mai le faamai, ia aua lava ne i tusi le lima o le tatou atunuu i le Malo. Ia tusi mai, a o la ua savavali le Malo, faamalosia le faiga o tui.

O le mea lea lau afioga i le Minisita, o le tatou galuega e fai faatasi. O le tatou galuega e fai faatasi. E le faapitoa e na o la ta Matagaluega ta te galue ai. O i tatou o taitai o le Malo, o fea lava tatou te aga i ai, o lea ua aumai le faatuatuaga o le atunuu.

O mea ia o taavale avemai, lau Afioga i le Minisita, o fea se mea a aumai le mai mai Savaii i Tuasivi ona aumai lea afe tuu i Leulumoega. Ona tuu lea o le mai i totonu o le taavale, ona toe sau lea o le taavale momoli mai i Apia. E a? E le mafai lava ona sau sao le taavale sau i Motootua toe avatu toe alu i uafu. Ua faatasina le mai. O le mea lea, lau afioga i le Minisita sei seu silasila ane i lea itu. Ia silasila i le fale faamama toto i Tuasivi, e faafesagai ma le faitotoa o le faleoti. Lau Afioga i le Minisita, aua o le mea moni lava lea, ta te nofonofu lava i le faitotoa o le fale faamama toto ma o ta tilotilo atu i le mea e ave i ai ta ita. Ia fai se fuafuaga ma se tofa i lau afioga. I le tulaga lea o le fale faamama toto, ave mamao i se isi mea, e aveese ai le palaai o le tagata o le a alu i le fale lea.

O le fale e taoto ai mai. Lau Afioga i le Minisita, a outou o nei ma outou tutu mai tua i le mea o lo o i ai le falemai i Tuasivi, ua mavaevae atoa lava le wall o le fale. Ua toetititi lava toulou ifo faatasi i lalo mai, o foma ma teine tausimai. E le o silafia e outou i Apia nei, leaga e manaia Motootua. A o matou i Savaii, ia lene ua taatia atu.

O le tulaga i le vai, lau Afioga i le Minisita, o le falemaliliu la e i tala ane o le sami. O fea o faaalu i ai le vai lea e faaoga e le falemaliliu? Ou te nofo lava ma ou masalosalo i ai. Se i silasila ane lau Afioga i le Minisita, i le tulaga i vai ia. E po o le mea o faaalu i le sami, ia pe i ai se isi vaega o faaalu i ai, e mo le soifua maloloina. Se i toe asiasi atu i se isi taimi pe a maua se avanoa.

O le Minisita o Aoga lau Afioga Seuula. E tasi lava le kolisi i Savaii, e na o le kolisi i Vaipouli. Ua mafua i se a ona aveese le kolisi? O lea e i ai Avele, o lea e i ai le Kolisi o Samoa. O le a le mea ua aveese ai Vaipouli, maumau malae. O le a lea upu fai mai o le mea e lelei i Apia e lelei i Savaii.

Lau Afioga i le Palemia, e 16 sui usufono o Savaii, o le tatalo lea, silasila ae i le aoga lea i Vaipouli. O faleaoga tuai lea sa i ai le aoga ua...a na leai le aufaigaluega a le folesi, ua leiloa e le fuesaina, tulou le paia o le Maota. Ua matua maumau fale. O le mea lea e talosaga atu ai,

po o ai tonu Matagaluega, ia aseta a le Malo, se aumai ma le matou itumalo. A leai foi pe tender lea, e mataga lea mea o le o mai mamao o isi itumalo avatu, a o la e i luga o eleele o le matou itumalo. E pei o nai vaega ia.

O le matou kolisi i le Itu o Tane. Na ou talanoa atu i le faafafine la e pule ai, pe i ai ni mea e manaomia o le matou aoga. Ae saunoa mai e manaomia ni faiaoga. O faiaoga o le Science, faiaoga o le Maths ma le faiaoga o mea tau pisinisi. Lau Afioga Seuula faamolemole, ia o le faleaoga la e i ai toeitiiti 40 tausaga, faataatia atu i ou tafatafa aua foi lau faasoa.

Ona oo atu lea o se faamatalaga i le tulaga o le matou kolisi lava. E mamao Patamea ma Samalaeulu. E manaomia se pasi faamolemole, e faafaigofie ai ona aumai le fanau i aoga. O lea ua faafofoga le paia o le tatou Maota, i nisi o pasi na aafia ai le fanau aoga. O le mea lea e talosaga atu, pe le alagatau, ona fai nai pasi mo a tatou kolisi. E le gata i le Itu o Tane, a o kolisi uma lava i totonu o le tatou atunuu.

O le matou aoga i Tutagaivaaloo o le mea lea sa taunuu i ai le Tui Fiti. E manaomia se faiaoga, e toatasi le faiaoga ae 42 tamaiti. Lau Afioga i le Minisita, ua loa lou soifua, galue faafaiaoga. Ou te talitonu foi o le toatele foi o tamaiti e le i lelei i lou taimi. A o lea ua matou talosaga atu, matou talosaga atu i lau Afioga i le Minisita o Aoga, se i e silasila ifo i lea tulaga. Aemaise lava o le mea lea o le tuua soo e le puleaoga o le aoga, ae fai fonofono. E toeitiiti lava uma aso e lima (5) o le vaiaso, fai fonofono. E le mafai ona... e i ai nisi auala foi ia e fonofono mai lava le faiaoga ia i lana aoga? E leai nisi auala faapena, o lea e afio mai le afioga ia Toelupe, ina ia faamama ai le avega, aemaise lava o le tulaga lea o le grant. E \$100 tamaiti i lalo i le Primary School, ae \$300 a le tamaititi i luga i le kolisi. E a, e le mafai ona toe siisii i luga pe \$150 le tamaititi i primary ae faatumau pea le \$300 a le kolisi. O le isi itu, o alu atu ea se siakiina o nei tupe faaalu a le Malo? E tatau ona o atu e matua siaki lelei nei grant. E aumai lipoti a puleaoga, ae tatau lava ona o atu ia Auditors a le Malo, e silasila po o taunuu atu mea ia e aumai. O lea e lipoti mai i le Ofisa. E leaga o lou lava lea talitonuga, o le tu lava i luga ma savali, vaai, tago i ai. Ae le faapea e na o le nofonono i le malulu o le Ofisa.

O le totogi o mataupu i gauta i le Iunivesite, e \$2,000 le pili o le tamaititi i le Semester leni, e \$2,000. E lelei lava i le aiga e lava le faasoa, a o nai aiga e matua le lava lava le faasoa, e pau lava le tali o le fesili, o le malolo, a o le tamaititi o lo o i ai lona agavaa. E le iloa pe o le tasi lea taitai o le atunuu mo le lumanai. Ia taatia atu i ou autafa lau Afioga i le Minisita. Aua foi le tulaga e uiga i le pili ia o tamaiti aoga.

Lau Afioga i le Minisita o Faatoaga lau Afioga Laauli, se i silasila ane po o a ni lua metotia ma lau Minisita Lagolago e toe lelei ai le tau o le niu ma le koko. E pe le alagatau ona toe fai se ponesi, e pei o mea sa i ai i aso ia. E faaosofia ai le tagata galue. Pe faamata, mo nonogatupe foi ia e faatino ai faatoaga. O le mea lea e i ai faletupe, a ta sau e talosaga sa ta \$2,000. E toeitiiti lava uma le isi \$1,000 i le sau, sau, i Salelologa,

ae na o le \$1,000 le mea e maua. E leai se auala faafaigofie e mafai ai ona faamatuu atu nonogatupe. Ma e le o se galuega faigofie le faifaatoaga. E silafaga le Atua, e le se galuega faigofie le faifaatoaga. E ala lava ona tetele faatoaga a isi, ona o tulaga i le seleni. A o le mea lava ia o le tago i le sapelu vaeatu le paia i lau Afioga i le Fofoga Fetalai ma le mamalu o le Palemene, e le faigofie.

O le mea lea lau Afioga i le Minisita se i silasila ae i lea vaega aemaise lava le mea tau pusatalo. E talu ai nei, e \$40 i le pusatalo e tasi ae 22 kilo. Ae vili atu i Niu Sila i nai ou aiga, ae fai mai e \$6 i le kilo la e faatau ai. O lona uiga a 22 x 6 e NZ\$132 i le taga e tasi, a liliu e pei se mea o le WST\$200. Ona aumai lea o le \$40 mo le faifaatoaga ae tuu le \$100+ ma le tagata e ana le faitotoa. A fai lava e 1,000 taga i totonu o le container o le 1,000 foi lea o tai \$160 a le...se i silasila ane. E moni foi lava na faifaatoaga ae sa faitau elemeni foi.

O tulaga i fanau ia e i Mulifanua i le Esetete. Se faamolemole lau Afioga i le Minisita, se e fia maua ni o matou fanau mai Savaii. O le mea lea e i ai nei, toeitiiti lava fia sefulu fanua o isi. O Vailele, Vaitele o Aleisa, a o matou i Savaii, o la lava e tauposiposi pe maua se fanua pe leai. O le mea nei e weekend lava i Savaii i vaiaso uma. O lea e talosaga atu ai i lau Afioga se i silasila ane i lea vaega aua foi le tulaga i tatou fanua ia i le Esetete.

Ona oo mai lea o le faasologa i lau Afioga i le Minisita o Galuega tetele. Olo, a tuu i lo ta va nonofo o oe o le matua, Saleaula Levaopolo e tua i ai Vaituutuu. A tuu i se isi o ta va faaleaganuu, e tasi lava le tuafafine o Utu ma Taua, na o Lena o lea e afio atu le afioga ia Fepuleai. Ae a tuu foi i se isi vai nauna lautele, o oe o le paolo e maualuga ai le nuu lenei. Se i vaai i le tele o a ta faia. O le mea lea e talosaga atu i lau afioga. O le auala lea o le matou nuu, e tusa e le toe taua o se aualagalua, auala o le aai.

Silasila mai i le FK lea, o le FK lea o le aso 20 Fepuari 2020, ioe le Kapeneta, o le auala Satoalepai taamilo ae i Fagamalo o le tender lena o lea e i ai le auala, faamaonia i le FK aso 20 Fepuari 2020. A o le mea la e i ai, e na ona uma lava o Satoalepai, ae toe o atu le konekarate a le Apia 2 ea, fai mai o mita ia na totoe i i, i Satoalepai, o la ua avatu i o. O le a le sao o lea mea? Ae leai ma se faaupuga o le FK o mita e totoe ona ave lea i o. O le mea lea, se lau Afioga i le Minisita e pei ona ou fai atu, fai mai le tamaloa Salelologa e moni lava e valea, ae le valea uma. Ou te le o malamalama po o ai le poto na faia le mea lea. Ae a tau loa le FK, e na o le Tusi Paia lava i luga atu. E uma loa le Tusi Paia a le Atua, FK loa a le Kapeneta. Ae ou te le iloa la po o ai na faia le mea lea. O le mea lea, lau afioga i le Minisita, se vave lava o i ai.

O le isi itu, se o mea nei o konekarate e faatinoa galuega, leaga o lau upu lava lea na ou lauga ai i le 2016, lea e afio mai Laauli. E leaga o au na tu i le tootoo o le matou falelua i uta, o lau upu lava lea na muamua, ona tali atu loa lea o Laauli mulimuli se o le a fai, ae le i umi ae ou faalogo mai, ia ua tuli, ua faamavae si toaina.

O le mea lea, lau Afioga i le Minisita Olo, aua nei e pepelo mai ia te au. Se i e silasila ane lava, o le matua le faamaoni o nei konekarate. O lau tala ma le sao, o tala e fai i o, oi se talofa. E uma ona ta nei, ae tetele timuga nanei, toe leaga taeao. A o tau o konekarate oi e matautia. A fai o la e faafofoga mai faauluuluga o konekarate, o lea ua ou fai atu, faitalia ai lava latou pe feita ae ou te le popole i ai. O le matua...e oo i le maintain ina o auala, a fai ua meniteni auala, e pei lava o i i le mea lea e i ai Lano. O Lano a siisii le tai, e o mai lava i aso e lua (2), ua matua le sao le taavale i le aualatele i le lapisi o le galu.

O le mea lava lea ou te nofo ai lava ma mafaufau, a fai ua faakonekarate auala, mo le teuga o auala, na ona faaletonu lava nei, nanei uma ona toe faamama le auala. A o le mea lea e i ai, ou te tautino atu lava, e le faapea o ni au tala oleole.

O le alu lea i uta ia matou e lua (2) aoga, o le aoga a le kolisi ma le aoga a Laumoli, a o la e lei lelei le faiga o auala. A oo nei i le taeao i le taimi e pisi ai taavale, o lena ua matou talosaga atu i lau afioga i le Minisita, se i silasila ane i lea itu.

O le uafu i Satitua, lau Afioga i le Minisita, o le a le tulaga o i ai lea aseta a le Malo, leaga o au e i ai lou aiga i Malaela i Aleipata. Ua ta tilotilo atu lava ua vaoa faasoloatoa, po o le a se tulaga o i ai lea aseta. Ia ma le malaevaalele la e i o i Tiavea po o le a se tala mai. Ae ou te fai atu o la e silasila le Atua, ou te le iloa po o fea le mea e aumai ai ia mafaufauga. O ai le Savaii o le a sau i Tutuila afe i o. E tele atu le tupe i le sau i Tiavea e alu i Mulifanua, i lo le totogi o le sau ai i Tutuila i inei. O le mea lena, se matou te nonofo i Savaii ma mafaufau mai i lenei mea. Ia outou alolofa mai ia matou i Savaii. O le mea lea lau afioga i le Minisita, faafofoga mai le Taitai o le Malo, e tusa ai ma lea tulaga.

Lau Afioga i le Minisita, o le aualagalua o Saleia, ia alu loa Vaipouli, ia alu le auala. O lena ua taatia atu i le talosaga le aualagalua o Lelepa ma le auala o si nei nuu, e taatia atu i ou tafatafa.

O le tulaga i le pau o le pili o le suavai ma le pili o le moli, malo faafetai. E faafetai e tusa ai ma le faamamaavega. O le pasese o vaa, ia faafetai e tusa ai ma le fesoasoani. E pei lava ona saunoa se isi sui usufono, se i e silasila ifo lava i tamaiti ia. E a pe a se i lima (5) loa tausaga, totogi le \$6. Ia o si nei lava tamai tamaititi, a tuu lava i totonu o le atosipi, e mafai lava ona alu i totonu o atosipi pe a fai lava...si nei lava tamai lua (2) tausaga ae..

**FOFOGA FETALAI:** E toe tolu minute o le sui usufono.

**Tofa SEUAMULI FASI TOMA:** O le uafu i Salelologa. Lau Afioga i le Minisita, le faleoloa la le e i ai. E faatausavali solo ia oloa a le fanau. A o ai lea Saina e taua, e tatalo atu ai i le Minisita se i e mataala ane i lea vaega.

Ona oo mai ai lea o se tala i lau Afioga i le Minisita o Pisinisi ma Alamanuia ma Leipa. Lau Afioga Leatinuu, faamalo galulue. E faamata o le a se silasila a lau Afioga i le Minisita, i tulaga o faleoloa o Saina. E



le mafai ua lava lava Salelologa e laisene ai pisinisi ia? Ae tuu nuu i tua mo nai aiga e fai ai a latou pisinisi. O le mea lea e i ai, po o ai lava le nuu, e na ona fai ai lava o le pisinisi a le Saina 2 i le 4 atoa, ae leai se monotaga faale-lotu, e leai foi se tautua nuu. O le mea lea e talosaga atu ai i lau Afioga i le Minisita, pe o lau afioga e ou tonu le Matagaluega lea i tulaga ia i pisinisi ia a Saina. Se i e alofa ane i pisinisi faleoloa o nai o tatou tagata.

Lau Afioga i le Minisita pe o oe lea e fitoitonu i ai le laiseneina o taaloga bingo? O aso ia a o laisene i le Matagaluega o Leoleo, o le faigofie ia. E na o le sau lava totogi le \$100 \$200 uma. Aua foi o la ua i ai ma le sainigalima a alii ma faipule. A o le mea lea e i ai le Matagaluega a outou, e alu atu i i, alu atu i i, fetulinai solo. O le mea lea lau Afioga i le Minisita, se i silasila ae, o la ua \$600 i le ono (6) masina. Pe le mafai ona alu ai i le tau lena, a o le faafaigofie. E na o le expire a, toe sau toe totogi le isi \$600 uma. A o le mea lea e i ai, e pei na ona taatia atu faapena i lau Afioga i le Minisita, pe o le a le mea ua faafaigata ai faapea ia le laiseneina o nei taaloga. E leaga e pau lava lenei o le tiakono toeaina e vili bingo, e sue tupe e tautua ai le lotu. E taatia mamalu ia faale-lotu faale-Malo seia uma fai, ae sue tupe. O le mea lea lau afioga i le Minisita se i e silasila ae i lea itu.

O le eleele lea na galulue ai Vaipouli i aso ia, o le eleele lea e tau o Mumea. Na maua ai le tupe a lo matou nuu i le lisi, i le tausaga mai le Matagaluega o Aoga. Alu ai alu ai, te i ua ou alu atu, fai mai le tagata lea o Soosialo David Fong i le Matagaluega lea o eleele. Ae te i ua sau fai mai ou te le iloa po o sou uso Leatinuu. Ua fai mai o le fanua ua uma ona fua e le Malo, o le fanua umia saoloto. A o la ua i ai le faaiuga a le faamasinoga e pule alii ma faipule. O le mea la lea ua le mautonu ai, po o fea tonu e malosi o lea itu. Ia o la ua le toe i ai se aoga. A fai o le tulaga lea e pei ona ave i le tatou anavatau, o fanua o le Malo o lea e i gauta ia...O le a se tofa i lau Afioga i le Minisita, ae faamatuu maia lena eleele pe a faapea o lena e i lalo o le Malo. Ae afai e malosi atu le faaiuga lea a le faamasinoga. O lea ua tuu ai le pule i alii ma faipule, ia faafetai i le Atua.

O le galuega faavaitaimi, lau afioga i le Minisita se i silasila ae. E tau leai nisi o lenei itumalo e o i avanoa o galuega faavaitaimi. Pe leai sau fesoasoani mo ta ita, se i aumai si na faamalamalama. Aua a o ae tagata, le tupulaga talavou a lo matou itumalo. Ae ou fai atu, a faapefea ona outou o i le faigata, ae vaai i eleele o le tatou itumalo. O le mea lea lau Afioga e tau lava ina avatu leaga o lea na aumai ia te au le talosaga. Ae taatia atu pea i ina i tafatafa o lau afioga, se i e silasila i ai.

Manu lava ou te le i alu ese, o mea ia o tatou vavao, manu lea e afio mai le Palemia. O le bingo e tapuni i le 6 i le afiafi o le Aso Toonai. E a pe a tuu atu i le 11 i le po o le Aso Toonai e tapuni ai, leaga o au e fai lau bingo i le po. O le mea lea e talosaga atu faapena, ae tuu mai e tatala mai lava i le taeao o le Aso Toonai e tau i le 11 i le po, e pei lava o le mea na masani ai. E tau lava ina taatia atu faapena e tuu atu i

tafatafa o lau afioga i le Minisita, o lea foi e afio mai le Afioga i le Taitai o le Malo, aua foi tulaga i le puipuiga o le Koviti-19.

Ona oo mai lea o se tala a lenei itumalo i lau Afioga i le sui Palemia, aua foi tulaga i tupe maua.

O le tulaga i le avamalosi, ua tele faalavelave tau taavale ua maumau ai le soifua. Pe le alagatau ona silasila lau Afioga i le Minisita i le avamalosi i totonu o le atunuu. Aemaise foi ua faatupulaia le toatele o tupulaga ma feoi i le auala ma aisi solo. E mafua mai ona o tulaga tau le pia, aemaise o le a se tulaga o i ai le fausiaina o lea foi ava faamolemole.

Ou te fia malamalama lau Afioga i le Minisita i taavale ia ou te vaai i ai, o atigitaavale la e i autafa o le Ofisa o le Tiute i Matautu. Na matou o atu e ave i tua le matou container o le aoga i Tutaga i le masina o Mati. Ou alu atu loa ou nofonofo i le pito i tai o le Ofisa. Na ou nofo lava lea ma ou tilotilo, talofa e, e fai o le tele o le vai e tele le namu, a o le tele o le lapisi. Ou faapea, e lea e atu e vaai tua i le Komiti tumama ae se i vaai o le mea o lea e tu i le taulaga. Se i vaai i ai, ou te nofo lava ma o ta mafaufau, ae a o mai nei le aufaigaluega ma a latou vali laugutu o le matua aulelei lava. O le mea lea, se i silasila ae i lea itu. E leaga o lea e autovaa mai lo tatou atunuu ma silasila i ai.

**FOFOGA FETALAI:** Ia faauma maia le saunoaga a le sui mamalu. E na o se faamanatu lava i le sui mamalu ma nisi foi sui, ia agai mai pea a outou lauga i le Nofoa, faatoa agai ai i le Malo.

**Tofa SEUAMULI FASI TOMA:** Lau Afioga i le Fofoga Fetalai, ona oo mai lea o se faamatalaga i le Matagaluega o Leoleo ma Falepuipui, faafetai e tusa ai ma le auaunaga. Lau Afioga i le Minisita, e i ai nai faitotoa la e faaletonu i le Ofisa o Leoleo la e i Fagamalo, aemaise o lo o i ai nai vaega e fia faaleleia o le Ofisa ma le faleai la e i tua. O le faleai la e i tua o lo o taumamafa ai nai leoleo, e tatau ona puipui, ua tatau ona puipui mo le soifua maloloina.

O le konekarate lea o lo o faamamaina le vao. E talosaga atu i lau Afioga i le Minisita, o le a le mea e tuu mai ai i le matou nuu e faamamaina le lotoa, ona avatu lea o le seleni ma le matou nuu. Ailoga e amiotonu lea mea, o le tausi e le matou nuu o leoleo, ae ese le tagata e moaina le vao ma ave i ai le faamanuiaga.

O le mea lea lau Afioga i le Minisita, e tasi ia feagaiga a o matou nuu, o le Matagaluega o Leoleo o lo o matou faafeagai. O le tulaga i le sela la e i Fagamalo. O le sela, faafetai tele lava, faatoa ou iloaina i le po o le Aso Faraile po o le po o le Aso Toonai. E ai mea lelei lava lo matou nuu i le po i le ona. O le mea lea e talosaga atu i lau Afioga i le Minisita, se i silasila ae i lea itu. Pe le alagatau ona i ai se vaegatupe a lau Matagaluega, mo le nuu lea e tu ai totonu le sela. E tusa a lea pe ai mealelei atoa i le po o le Aso Toonai i aga a le ona, a o la e fiala o la ua maua se seleni. O le mea lea e talosaga atu faapena i lau Afioga i le Minisita. A o le auaunaga a leoleo i le matou itumalo, e matua number

one, o le matua lelei lava. E pau lava lea o le mea lau Afioga, sii le tulaga o si tama la e vaai matou. Ia tuu i ai se isi taai e faatolu ai, e na o le lua (2) la e i ai.

Ia faafetai i le Matagaluega o Faamasinoga. Matamua, faamalo faafetai. O lea ua matau atu, ua tele ina pau ia tologi e manaomia e tagata mo le faamasinoga. Ae pau lava lea o le mea, se o pili e tolu (3), ua aveese ai faatonu o le Faamasinoga o Fanua ma Suafa. O le mea la ua i ai nei, na o le Peresetene lava ma faamasino e toalua (2). Ia na manaia lava le mea sa i ai le laulau o le Faamasinoga o Fanua ma Suafa. O le sui Peresetene, o faamasino e toalua (2), ma nai faatonu e toalua (2). E ese le manaia, e tatau lava leaga o le tu ma le aganuu. O le mea lea e talosaga atu ai i pili ia e tolu (3). O lea ua faataunuu ia pili ia e tolu (3). E fa (4) masina e faasalalau ai, o le matua tele lava o lenei fa (4) masina. Ae soia ia, leaga o lea ua pasi le Tulafono. Atonu lava o se taimi, ona silasila lea o lau Afioga.

Tulaga i le Minisita o Fesootaiga lau Afioga Toelupe, o le Falemeli la e i Fagamalo. O le falemeli la e i Fagamalo sa tele ina tala ai tupe i aso ia. Aua e fou nei isi lala o faletupe. E le mafai ona toe faaolaola lea vaega. O si na faletupe o le Malo e faaoga le vaega lea o le Samoa Post. O la la ua tolu (3) mea la ua i ai i totonu o le fale lea e tasi. O le Samoa Post, o le Samoa Commercial ma le Easy Money, o lea la ua tolu (3). E talosaga atu i lau Afioga Toelupe, a manaomia se leoleopo ma se teufanua, aumai sesi o le matou nuu, leaga o la e feagai...e tasi ia feagaiga a lo matou nuu. O a mea e tutupu i lo matou nuu, e le mafai ona misi ia le faletupe Easy Money, Samoa Commercial ma le Samoa Post ma le Ofisa o Leoleo. O feagaiga ia a le matou nuu e ese mai i faifeau. O le mea lea lau Afioga i le Minisita se i silasila ane aemaise lava pou telefoni la e i ai. O le pou a le Vodafone ma le pou a le Digicel i tai. E faamata e le aafia lo matou nuu i faalavelave tutupu e pei o le emo o le uila ma nisi o tulaga faapena, pe afai nei ia tulaga o pou ia. Ae silasila pea lau Afioga i le Minisita e tusa ai ma lea vaega.

**FOFOGA FETALAI:** Ua maea le taimi o le sui usufono. Faauma mai loa.

**Tofa SEUAMULI FASI TOMA:** O le a faauma atu. Lau Afioga i le Minisita o Tina ma Tamaitai. E \$2.1 miliona mo Komiti tumama i so o se falekomiti. O falekomiti o lenei itumalo, pe tolu ea nuu ia e avanoa e leai ni falekomiti. E aafia ai falekomiti i le seleni lea? O le isi itu, o le tupe lea e faaalu i le ie Samoa. E tuufesili lava lou mafaufau i le tulaga o le ie Samoa aemaise o le tulaga o lea ua tatou i ai. O lea e pei ona saunoa se isi o sui mamalu, o le pusaapa suauu. A outou silasila i pusaapa suauu lea ua i ai nei, e aumai nai nei lava tamai siusiu ia faapea. E le tasi lea o auala e aafia ai le soifua maloloina o le atunuu, o mea ia o taumafa ia. O nei lava tamai siusiu ia. O le mea lea e talosaga atu i lau Afioga i le Minisita, a tatou faia se tulafono, se aua le toe

faaogaina nei mea o toga i ni faalavelave. Ia tatou o e faamama. E pei na ona taatia atu faapena i lau afioga i le Minisita.

O le tulaga i le vai tumaoti, o lea ou te vaai atu e \$100,000, sina fesoasoani mo le vai tumaoti o lenei itumalo.

Ona oo atu lea o se tala i le Minisita o tupe. E \$1 piliona, e \$1 piliona le aitalafu. Ou faitau atu i le tala o le tupe lea fai mai, o se tulaga faigata ua fetaii ma le Malo fou, ona o le a amo uma le toe tologiina o aitalafu. Ua matua momomo lou loto i lea faaupuga. E \$1 piliona, o le a se vavega a le Malo, e mafai ona faatino ai manaoga o le atunuu, pe a te i ua aafia faafuasei tatou i ni faalavelave faale-natura? O le a se vavega, o le a se metotia a la Malo? E mafai ai ona maua se laveai mo le atunuu, pe a te i ua afea faafuasei tatou, e ni faalavelave faale-natura? O se faafesili lea i lau Afioga i le Minisita aemaise lava le mea tau loan faamolemole. Se faafaigofie ane a matou loan.

Lau Afioga i le Palemia, ona o lea ou te tilotilo atu o lau Matagaluega o lo o i ai le nusipepa lea o le Savali. Ou te le i faalogo mai lava i se sui mamalu, o lauga i le nusipepa lea, Savaili. A avatu nei nusipepa a le Palemene e tai luasefulu nusipepa, e sili atu a le nuu. A o le nusipepa o le Savali na o le taitolu tailima Savali a le nuu. A o le taua ia o le nusipepa lenei, e taua. O le 1995 na faaputu ai au Savali, e oo mai lava i le aso, o la e faaputu. E pei o se vaivai lea a lou matai, o le nusipepa lea. Ne i te i ua ta fealuai fealuai, ae sau se isi faapulefaamau le mea la ta te nofo ai ae ta te le iloa. O le mea lea se i silasila ane lau Afioga i le Palemia, i le tulaga i le nusipepa lea o le Savali.

Aemaise o taligalu, leaga e le o afio mai le Minisita o le Siosiomaga. O le taligalu lea a matou i Fagamalo, ia faafetai i lau Afioga i le Palemia. O le taligalu lea i i, i le mea sa i ai le falemai tuai i Fagamalo alu atu ai ma o i Lelepa. O le matou nuu la e i ai faletalimalo lelei lava o le La Goto ma le Savaii Lagoon, se i silasila ane lau Afioga i le Palemia, e tusa ai ma le talosaga a lenei itumalo, aemaise lava o le togatogo lea i tua o le aoga a le Itu o Tane. E leaga o matou e sau mai Avoa, Lelepa, Fagamalo, Satoalepai, e sau uma lava le vai lena i le aualalaupapa lea ei Safai. O le mea lea se i silasila ane lau Afioga i le Palemia i nai toa ia. E manatu foi o lea e afio mai le Afioga i le sui usufono ia Toeolesulusulu, o ia lea sa uma ai le tupe a lo matou nuu i le poloketi lea na fai po o se mea o le 2013, i nai mea na o talivai. Ona e malamalama lelei i le tusiga o le ata o le vaega lea. Atonu o le ala foi lena o le le lava o le faatinoga o le poloketi, leaga, ua tele atu le tupe a le inisinia na alu.

Ona faauma atu ai lea o se leo o lenei itumalo lau Afioga i le Fofoga Fetalai, faafetai tele lava e tusa ai ma le avanoa o lenei itumalo. O le a foi se faafogafoga mai a le itumalo aemaise o Samoa i se upu ua le tautamalii i sa outou faafogafoga. Ia malu ave i fale se vaivai o le auauna.

Lau Afioga i le Fofoga Fetalai, lau Afioga i le Taitai o le Malo, lau Afioga i le Palemia aemaise foi o le aiga Kapeneta. O lea ua momoli

atu manaoga o lenei itumalo. O le a foi se faafogafoga i se upu ua le tau, ia toe foi maia ma te nofonofo.

E faafetai e tusa ai o galuega lelei i lau susuga i le Failautusi o le Fono ma le Ofisa o le Fono, malo galulue. Aemaise foi o Ofisa Sili o Pulega ma le Matagaluega, faamalo faafetai.

Le mamalu o malu o le Malo, ia faafetai tele lava e tusa ai ma le puipuiga o le saogalemu o le Palemene nei.

E le o puaoa le Atua i lana silafaga aua outou tiute ma faiva, aua foi le faatinoina o lo tatou valaauina.

Manuia lau Afioga i le Fofoga Fetalai, manuia lenei Palemene, ae ola Seuamuli Fasi Toma i le alofa o le Atua, faafetai.

*Na faalia le agaga fiafia o le Maota i le patipati o latou aao i le maea ai o le Saunoaga Faa-Taupou a le sui usufono mo Gagaemauga 2.*

**FOFOGA FETALAI:** Ou te faasilasila atu ua toe amatalia nei Taulumaga o le Fono Aoao Faitulafaono. Ia e fai le tatou malologa ua maea ona saunoa le sui usufono mamalu o Gagaemauga Nu.2. Ia talitonu lava o lo o faasolo pea ia a tatou lauga mo toega o le tatou galuega o le afiafi.

Ia e na o se manatu lava i o tatou sui usufono mamalu, ia agai mai pea tatou lauga i luga o le Nofoa, ia aua lava taulumaga masani o le tatou galuega i totonu lava o le Palemene. E i ai le manatu e aua le taua se suafa i totonu o le Palemene, ia ona e le mafai ona tali mai.

Ia ae o le agaga faaaloalo ou te tuuina atu le avanoa mo se isi sui usufono mamalu mo sana saunoaga. Ia ou te matau atu o lea ua sauni mai le sui usufono mamalu mai Aana Alofi Nu.1, lau Tofa Fesolai, ia saunoa ia.

## SAUNOAGA FAA-TAUPOU

**Tofa FESOLAI APULU TUSIUPU TUIGAMALA (Aana Alofi 1):** Faafetai i lau Afioga i le Fofoga Fetalai mo lou avanoa, ua faalogo foi ma le totoa i lenei vaega o le afiafi i le tuualalo a lau Afioga mo matou nei e faapuupuu a matou lauga. Ae sa ou manatu lava i lauga a toeaia nei, sa tatau ona i ai e pei ona i ai lau samala, ua tatau ona ta lau samala i le aualii lea na uma atu ia lauga. Ia ae faafetai ua tuu avanoa pea lau Afioga i le Fofoga Fetalai.

E faafetai atu i lau Afioga i le Fofoga Fetalai, tulai lava ma le agaga maualalo i lau Afioga ma le ava tele. Ae fai mai ia le tala a le tusi, “*Amuia e loto mama, aua latou te iloa atu le Atua. Amuia latou o e faatupuina le filemu, e taua i latou o fanau a le Atua.*” O le afiafi lenei, o le afiafi lenei o le tatou Maota, o fanau a le Atua.

E muamua ona ou faatalofa atu i le Paia maualuga i le afio o le Ao Mamalu o le Malo, le Afioga ia Tuimalealiifano ma lana Masiofo. Ou te faatalofa atu foi i le faafogafoga tapuai Sui o le Fono a Sui Tofia i lau Afioga ia Le Mamea ma lou faletua. Ou te faatalofa atu foi i le paia

maualuga i lau Afioga Fiamē lau Afioga i le Palemia ma le mamalu maualuga o lau Kapeneta faapea le mamalu o le Palemene. Ou te faatalofa foi i le paia maualuga i le afio o le Faamasino Sili ma le mamalu o Faamasino faapea le Maota o Faamasinoga. Ou te faatalofa foi i le paia o fata faitaulaga e fia, le paia o le au faigaluega totofi a le Atua i Samoa. Ou te faatalofa foi i le paia o Ofisa Sili o Pulega o Matagaluega uma, ou te faatalofa atu i lo outou paia ma lo outou mamalu.

Aua o paia ia aua Aiga o Tama, o Tama foi ma o latou Aiga, le Usoga a Tumua ma Pule Ituau ma Alataua Aiga i le Tai ma le Vaa o Fonoti. Ae ou te faatalofa atu foi i lou itumalo o Faleasiu o Aana Alofi Nu.1 i le paia aua Aiga Satuala, i le afio ai o Leaupepe ma Leaupepetele. Ou te faatalofa foi aua le Aiga o Mavaega, i le afio ai o Maiava ma Tamapaa faapea le matua ia Tala ma Taavao. Ou te faatalofa foi aua le afio o le Taulagi, i le afio o Tofa o Alo o Vaafusuaga. Ou te faatalofa foi i le paia maualuga o Alo o Tamaalelagi i le paia aua le afio o le Tapunuu i lau Afioga Mailo o le Tama a le Aitu ma le Maugafa o le Tama faasausau aua le Faletolu.

Ae ou te faatalofa foi i le mamalu maualuga i le Faletolu ma Fuaifale lau fetalaiga Sauvaō, lau fetalaiga Apulu ma lau fetalaiga Fesolai, mamalu maualuga ia Togiailua, ma le Sui ma Tumaua. O Paia ia o lenei aso ma le mamalu maualuga o mamalu tauee i totonu o le Maota. Ae ou te faatalofa foi i le paia maualuga o tupu ma ee o afifio ma papaaao i atunuu mamao aua ia le latou tapuaiga tausī ao alofaiva Samoa i ana Fonotaga.

Ae avea ia lenei vaega o le afiafi e fai ai au ma fofoga o lou itumalo e momoli atu le agaga o le faafetai i lau Afioga i le Palemia ma lau Kapeneta ma le mamalu o le Palemene lau Afioga i le Fofoga Fetalai. Momoli mai le agaga o lou itumalo faamalo le faatoatoa, faamalo le tau, faamalo le onosai i fita ma faigata sa o tatou asaina mai. Malo lau Afioga i le Palemia. O le agaga lea o lou itumalo, avea ai au e fai ma sui e momoli atu ai le agaga o le faafetai i lo tatou Maota i lenei aso.

Lau Afioga i le Fofoga Fetalai, ia atonu e le tele se manatu, o nai vaega o lou itumalo e manaomia o faleaoga. Lau Afioga i le Minisita o Aoga, e 3 ia aoga tetele i Faleasiu, tasi le itumalo. E i ai le aoga o lo o i ai i le taimi nei po o le 200 ma ona tupu tamaiti aoga. O le upu moni i lau Afioga i le Minisita, e na o le faifeau ma lona faletua ma nisi o lo o aoaoina alo ma fanau. O le tatalo a Aana Alofi Nu.1. lau Afioga i le Minisita, ma le mamalu o la outou Kapeneta, e manaomia ni faiaoga aua le aoaoina o alo ma fanau o lou itumalo, aua o le lumanai lea o nuu ma itumalo, nuu ma aiga aemaise le mamalu o le tatou atunuu.

Lau Afioga i le Minisita, ou te masalo o le aoga lea e pito i uta i le alu atu lea i le auala lea i Aleisa e tau i Taumalala lea tou te silasila i ai, e i autafa o le auala. O le alu alu lava o lea ua fia tafao sau faiaoga i le aoga lea. O le ala lea o le tatalo atu i lau Afioga i le Minisita, atonu na aumai muamua se talosaga po o le tausaga ua mavae e manaomia ni faiaoga. E na o le faifeau ma lona faletua ia ma le au a, e, i le mea la e

fai ai, ae leai ni faiaoga lelei. O le ala lea o le tagi atu ma tatalo atu i lau Afioga i le Minisita.

Lua, e manaomia le faaleleia o ni vaega o isi faleaoga ia e lua. E pei ona tatou taape ai i tua ma faasalalauga e manaomia le Wifi e fai ai aoga a tamaiti. Lau Afioga i le Minisita o Aoga, o le a le taimi e faatino ai ia mea? Ae o le a le talaiga na fai? Faamolemole lau Afioga i le Minisita, faataunuu mea ia. O le tatalo a Aana Nu.. faataunuu mea na o tatou savavali ai, ae le na ona saunoa ai ae le faia. Lau Afioga e manaomia mo le faaiuga o lenei tausaga ia oo atu ua tutu Wifi i luga o faleaoga aua le aoaoina o alo ma fanau, o le lumanai lea o lou itumalo aemaise Samoa ma lo tatou Maota lenei.

Lau Afioga i le Minisita o Aoga, ua uma ona fai le hall a le isi faleaoga. E pau lea o le sui usufono ua uma ona fai ae o lea e le i maopoopo, e le i taoto lelei ia le Faigamalo. Ae ua uma ona tapena hall e tusa i le 70 i le 80 le umi. Ua uma ona totogi e Fesolai le faiga o le kamuta ma mea uma na fai ai. Ae o lea e le i tulaga lelei galuega ina ia taumafai e faatino ia le tatou Faigamalo. O le tatalo i lau Afioga i le Minisita, ia e i ai nisi vaega e manaomia ai le fesoasoani a lau Afioga i le Minisita.

Lau Afioga i le Minisita o Galuega, o lo o manaomia e lou itumalo, e i ai vaega o lou itumalo e le i oo i ai le power. E le i oo i ai le moli eletise lea e mumu ai. Mafua i se a? Tatalo mai, tatalo mai pau lava lea o le tali, taoto mai. Ae o le lagona o Aana Nu.1 faamolemole lau Afioga i le Minisita o Galuega, e manaomia le fai o moli. O le taimi lenei, o la e ola i le moli fagu tulou le faafofoga, ola i le moli matagi nisi o lou itumalo, ae alofa i alo ma fanau e fia fai meaaoga. O le ala foi lea o le tatalo atu i lau Afioga i le Minisita o Galuega, se i alofa mai, e fia faaoo le power le eletise i nisi o vaega.

Ae ou te tatalo atu foi, i le vaiaso talu ai, na ou alu ai ou te asiasi. E maualalo le Maota lenei i laau ae o lo o alu ai le uaea eletise i lalo. Lau Afioga i le Minisita o Galuega, e manaomia le fesoasoani i le Matagaluega o Eletise, se i vaai mo le saogalemu o tatou tagata, pe a oo ina timuga. O le tatalo atu lea i lau Afioga i le Minisita. O nisi vaega e le i oo i ai le vai, e faigata e alu e ae lava luga.

Lau Afioga i le Minisita tau ala atu i le Afioga i le Fofoga Fetalai, se i silasila i ai. A le mafai ona oo i ai le vai, malie lau Afioga manaomia ni tanevai e faatutu e o i ai, e agai i ai. Ou te masalo ua ova ma le 10 loli vai ua uma ona ou faatauina e tufatufa i tagata nei. E fai lava i tupe a Fesolai ae le i maua se totogi ona o le a? O le alofa i le Afioga i le Minisita aemaise ia le Faigamalo fou lenei, le Afioga i le Palemia ma le mamalu o le Kapeneta.

Lau Afioga i le Minisita o Falemai, ou te manatu e le i mamao atu po o le lua masina talu ai, lau afioga e fia maua se fesoasoani nisi o lou itumalo e mai fatu. Ae na toe logo atu i lau failautusi, ua maliu.

Lau Afioga se i silasila totoa i ia mea, se i toe vaai i ai, o le a le faiga e fai ai? O le a se auale e mafai ai ona fesoasoani i o tatou tagata e ave ai i fafo. Ae a fai e faapea, talofa e, talofa e i tagata o lou itumalo, e logo

atu ae o le isi aso faaletonu. O le isi mea, na ou oo atu foi, ave i le falemai ae fai mai e leaga le faata. Fai mai se i maua mai le faata, o afea e maua mai ai? Ae ua maliliu tagata.

Lau Afioga i le Minisita, silasila totoa i ai, o lea ua faagasolo ia lo tatou faamoemoe ae maliliu tagata o lou itumalo. Na ou tagi atu, savali atu, ae o le a le mea lea ua tupu? Tagiuu le fatu o Fesolai. O le itumalo o Aana Nu.1. ua maumau soifua. O le tatalo lena i lau afioga.

Lau Afioga i le Minisita o felauaiga o vaalele, o le a le mea e tuu ai le vaalele? Ae le aumai? E tuu o le a? E faafefea o tatou tagata alo ma fanau o lo o i Fiti? E fia aumai, alofa i tagata. Ae o le a le mea e tuai ai ona aumai?

Lau Afioga i le Palemia ma le mamalu o le Kapeneta, ou te manao e aumai le vaalele, aumai ai alo ma fanau. Na aumai lea i ina, afai e leai ni pasese e o ai, o le a le mea e le faafao ai ia nofoa ae lau ai ia tatou tagatalo e ave i Niu Sila? E faaaoga e sue ai nisi tupe. Ae e le o le aumai tutu iinei. Aumai muamua i, ave ai loa tatou uta i Niu Sila faaaoga e sue mai ai nisi tupe, pe afai e le mafai ona tatala ia alavaa. O le talosaga lena i lau Afioga i le Palemia aemaise le Minisita o Vaalele, aumai le vaalele, aumai i le vaiaso lea. Pe leai lava se tupe aumai pea.

Lau Afioga i le Minisita o Leoleo, o le tatalo se i toe silasila totoa i lau Matagaluega. Se i toe fai se isi Minisita e faatutoatasi leoleo, ia aua ne i toe lavea i nei mea o polokiki ma le afaina ai o latou pulega. E tatalo atu i lau Afioga i le Minisita faapea lau Afioga i le Palemia, faatutoatasi, fai se isi Minisita e alu e puipui ma le mamafa o lau avega. Ia, aua... ta musu e toe tautala i mea na tutupu ananafi ma le taimi ua sola, ana o au, e leai se avanoa, Tanumalala. O le sui usufono o Aana Alofi Nu.1. e le fiafia i ni mea piopio.

Lau Afioga i le Minisita o Fanua 250 eka o Faleasiu o lo o i fanua o le Malo. O le taimi lenei, o le tatalo a Aana Alofi Nu.1. faamolemole e tusa ai ma a outou faaaliga na fai, e toe foi mai. O le tatalo i lau Afioga i le Palemia ma le Minisita o Fanua, faamolemole e toe foi mai ia le 50, 250 eka o lo o i totonu o Faleasiu e faaaoga e tagata o lou itumalo. O le mea lea ua tele ina o solo, leai ni fanua. Ua laitiiti eleele i totonu o Faleasiu e galulue ai lou itumalo, tatalo i lau Afioga i le Palemia ma le agaga faaaloalo, se toe faafoi mai, faafoi mai le 250 eka lea e i totonu i i, e vaevae mo lou itumalo. E pei ona saunoa ai i le taimi o le tatou faailoa ma le agaga faaaloalo.

Lau Afioga i le Minisita o Faatoaga, e i ai le mea lea e misi, niu ma koko, fai. O le a le mea e le toe fai ai ia se tatou ponesi? Toe tulei ia o tatou tagata e toto le niu, toto le koko ae ave i ai ia le tai \$5 i le niu, \$5 i le koko siisii i luga le ponesi, ae o le a tumau ai lava i lalo i le \$1.50? E le mafai ona... e augata le isi tagata e galue. Ae a \$5 i le koko, lau Afioga i le Minisita o Faatoaga, e soo atoa fanua o faaaoga le niu. O le tatalo atu lea i lau Afioga i le Minisita aua le toe faatamaoiga o le niu ma le koko ia aua le lumanai o lo tatou atunuu.

E le o toe umi se tala i lau Afioga i le Fofoga Fetalai, te i foi ua otegia mai au e lau Afioga. Lau Afioga i le Fofoga Fetalai, e tuualalo atu i le



Minisita o Tupe, e le i maua sau moe anapo. Tea le 3 ua moe lou toalua tulou le faafofoga, ae la ou te nofo ma le ata o le telefoni lea e i ai lou ata, ona ou manatu lea, mafua i se a? Mafua i se a ona ou tilotilo i lou ata? E ala la ona ou tilotilo i lou ata, fafagu mai ia te au le faasoa a lau Afioga. Ai a o lea le Minisita aulelei toe faasoa lelei.

Lau Afioga i le Minisita, ua ou tei i le fai mai o lou toalua e ese le ata lea e te tilotilo ai. O le tatalo e ala atu i lau Afioga i le Fofoga Fetalai, ma lau Afioga i le Minisita, faafetai i le faasoa lima lelei. O lea ua maunoina ma faalogologo, aua le faasoasoina o tupe a lo tatou atunuu aua se lumanai o Samoa.

Faafetai o lea ua sii i le \$200 le penisione a tagata matutua. Lau Afioga, o le a le mea e le tuutuu laitiiti atu ai i luga? \$250 ae pule lava lau Afioga ua uma ona pasia. O le tele o nisi mea ua uma ona saunoa ma fetalai atu ai nisi o sui usufono. Ae o le tatalo atu lena i lau Afioga, faataunuu loa, fai loa, semeamanu o maua ia lo tatou avanoa. O le \$1 miliona toe faaatoatoa mai ia tatou \$1 miliona.

E fia oo se tala i le Afioga i le Minisita lau Afioga i le Fofoga Fetalai, lau Afioga Matamua. Ou te masalo e le i mamao atu lou nofonofu ai i i le fale lea, le maota lea, pe le power. O le a le mea na tupu? Manava tagata e le i taitai. Vevela le fale, pogisa totonu, omai i fafo tagata. Aisea? Pe le power. Ua pei au o se faimoli ou alu tutu i o le sole, tope le moli, tope le moli. Ae soa le poumoli i le 4 i le vaveao, lau Afioga i le Minisita o Eletise, soa i le vaveao i le 4 i le vaveao ae faatoa fai ua tea le 10 i le taeao.

O a ia tulaga faapea? Leai se manatu mamafa, ao i o le faautugatagi a Samoa le malae lea. O lona uiga, ua toe tele foi isi galuega e toe fai, leai ni galuega lona uiga o le a toe tolo foi faamasinoga. O le tatalo i lau Afioga i le Minisita o Eletise, e tauala atu i le Afioga i le Minisita o Faamasinoga, manaomia se afi i le vaiaso lea, manaomia se afi i le vaiaso lea.

Aua o le mea lea ou te matauina, ou te alu ou faitala i le Afioga i le Minisita, Matamua manava tagata e le i taitai le taeao. Maumau tupe a le Malo e totogi ai ae leai se galuega o faia, upu moni ma upu sao. O lea e faafofoga mai ia le matou Matagaluega, ae o le vaai lena a Fesolai, lea e nofonofu i tai i i, lea lafi i i. Ae e le iloa e le auvaega, o la ou te matauina uma mea e fai. Fai mai le isi vaega lea e i tua, fai mai e faavalevalea. Ae leai e le valea le sui usufono o Aana Alofi Nu.1. E potu e vaai, e matau mea, e le o se matai faavalevalea. E moni foi e valea ae e le valea uma.

Lau Afioga i le Minisita, manaomia se afi. O lona uiga a toe pe foi i le vaiaso lea, toe malolo foi toe lusi ai le isi fia afe tala e totogi ai tagata ae leai se galuega o faia. O le tatalo i lau Afioga ma le tuualalo, se i toe silasila totoa.

Lau Afioga i le Fofoga Fetalai, tasi lava si mea lea e totoe e faatalatala i se lagona o Aana Alofi Nu.1. Ou te le iloa po o le a le Matagaluega e i ai le mea lea. Ae o lea e faafofoga mai ia le Kapeneta. Lau Afioga i le Palemia ma le mamalu o le Kapeneta, e lagona lou alofa i fafo. A

manatu i le faavaeina o le faamoemoe, e le taugofie. Sa o tatou tagi, ma tuu atu i fafo ia o tatou lagona, alofa mai. O le tatalo a Fesolai i lau Afioga ma le Palemia ma le Kapeneta, o le a le mea e le faapalota ai tagata ia? Toe fai se faautaga e faapalota tagata ia e tali ai le alofa, tali ai le agalelei. O lea e mafai ona palota atu tagata ia e sitiseni i inei i Niu Sila, palota agai i Niu Sila. O le a la le mea ua le mafai ai ona palota mai nai o tatou tagata na agalelei mai i le faamoemoe? O le tatalo lena e valuvalusia aa i lau Afioga i le Palemia ma le mamalu o le Kapeneta. O se manatu lena a Aana Alofi Nu.1. e avatu.

Lau Afioga i le Fofoga Fetalai, ia ua uma se tala a Fesolai, ae se i ou toe faafetai tasi i lou itumalo. Faafetai i Aiga ma le Faletolu. Faafetai tapuai. Faafetai ua avea foi au ma o tatou sui usufono e momoli atu ai le agaga o le faafetai tele, i lo outou paia ma lo outou mamalu, i la outou faaeaea ia te au. Ia Viia le Atua, o le agaga maualuga, ia o lena ua faatino nisi o vaega, toetiiti lava uma ona totogi ia le tatou loan \$30,000 i Sapulu ma Lealaalii, toetiiti lava uma toe \$1 lava le mea la e totoe. A o Moamoa ma Tauoo, ia o lena ua uma le galuega, e umusa taeao ia le tatou galuega.

E momoli atu le faafetai tele. O le a se vaivai ma le mativa o lou nei tagata, ae ou te taumafai lava e faatino mea i totonu o lo tatou nuu. O le mea lea e momoli atu ai le agaga o le faafetai tele, Aiga ma le Faletolu ma le Fuaifale i la outou tapuaiga. Malo fai tatalo malo le onosai, ia malo foi le faatoatoa. Ia manuia le aso ma le aso.

*Na faaalua le agaga fiafia o le Maota i le patipati o latou aao i le maea ai o le Saunoaga Faa-Taupou a le sui usufono mo Aana Alofi Nu.1.*

**FOFOGA FETALAI:** Faamalo faafetai tanoa faafetai foi saunoa i le sui usufono mamalu o Aana Alofi Nu.1. Ia, e manaia lava le puupuu ae anoa. O le mea lea, faafetai tele lava mo lou sao, ua faafofoga foi le Palemia ma le Kapeneta ma le Maota, aemaise foi o le faafogafoga mai a si ou itumalo. Malo faafetai sauni, faafetai foi tapena mo le tatou Tala o le Tupe.

Ia, ua avanoa foi le tatou Maota mo se sui usufono e fia saunoa. Ia, e matau atu o lea ua sauni mai le sui usufono mo Aana Alofi Nu.3, le Afioga ia Agaseata.

Tulai mai le sui usufono mamalu.

## SAUNOAGA FAA-TAUPOU

**Afioga AGASEATA VALELIO TANUVASA PETO (Aana Alofi 3):** E le tageno i se loto ma le gagana lau Afioga i le Fofoga Fetalai. Ou te le talaleu foi i le mamalu o le Nofoa, a o le agaga o le faafetai o lea ua e to mai le matupalapala, e avea ai o matou tagata e taumolimoli se lagona o Aana Alofi Nu.3. Ia i le Atua pea Lona lava viiga, o le

faafetai ma le faamanu aua e au le pule uma lava ma le mana ua taunuu, e manuia ai taumafaiga tau amata o le Fonousu ma le Fonotoa a Samoa i lenei Paeaiga Lona XVII.

Lau Afioga i le Fofoga Fetalai ma le paia o le Maota, ou te taofi, o paia ma mamalu malu tau ee nei o lo o tau i ai paia ma mamalu faalemalo ma mamalu faale-atunuu. Ae ou te le i laasia la le loaloa o le vasa lea e afua mai i Matie i Siufaga e i ai le seugaata a Tufu le Mataafa, seia paia lava Analega Fili ma Puletuu fai mai na mavaeaina ai le seuga ao a Malietoa, ae se i muai faasee lava lou vaa i ituavasa ne i galo ona alauta, ona lele lea o se laupula mamala to se mala fatiauma vasa e pei lava o le upu na fai i le alofisa o le tai samasama o tupu. Ae popoe foi Nuuuli ma Alao ae see lilia Saveasiuleo. Tulou, tulou lava. Ua mapu nei i fogaena le Malo paupo e pei o le tala ia tagaloamatua i Paepaelei, ua taoto foi sa o tautai i le vasa e alei le igafo, a ua to ai le ata ua mafua ai ona mamalu tuaau ma fuamalu.

Ua mamalu Tiafau o le malae o le faautugatagi a Aiga ma Tama, o Tama foi ma Aiga, Tumua ma Pule, Ituau ma Alataua, Aiga i le Tai ma le Vaa o Fonoti. O le fanua lava na faautu ai tagi a outou tuaa ma o matou matua na taavao ma pasami i le sailiga o le saolotoga ua outou sapi ma tatou oaoa ai i Faleseu. Ua pau lava Tiafau o lele e lagomau ma taoto mai ai atutiasa o Tama a Aiga na latou amo le pologa ma saili le loifofoga i le malolosi o auupega. Ae paga lea, na fiafia lava e tali lo latou tino i le pulufana a fitafita a ia maua malo. E ui lava ua tofafa mai i atutiasa, ae tafafao lava taliga o tufugauli. I le faafofoga pea o latou maui ola i saunoaga ma tuleiga o le Maota lenei.

Tulou la le afio o lau Afioga i Le Ao Mamalu o le Malo Tutoatasi o Samoa, lau afioga i le Tama a Aiga, lau Afioga Tuimalealiifano Vaaletoa Sualauvi II ma lau Masiofo. Tulouna le afio o lau Afioga i le Sui o le Fono a Sui Tofia lau Afioga Le Mamea Ropati Mualia ma lou faletua.

Tulou le afio o lau Afioga i le Faamasino Sili ma le mamalu o le Faamasinoga.

Tulouna la le Nofoa o lau Afioga i le Fofoga Fetalai, tulouna le afio o lau Afioga i le Palemia, o le na muaimalae i tofiga Palemia o le Malo Tutoatasi o Samoa e ala i tamaitai, a o oe lava foi lea ua e taimua i le Nofoaiga a Palemia o le tatou Vasa Pasefika.

Tulouna le ee o le paia i alii ma Tamaitai Minisita o le Kapeneta, tulouna le ee papaaao o sui usufono mamalu uma o Samoa o lupe lava na faia mai le fuifui ma faafelele mai e itumao aua faalagamaea a le Malo. Se i ou talele ane lava e faigata le tapuaiga mamalu a le atunuu.

Tulouna malae faitauina o Samoa, tulouna Vailoa o le toaiga o Tumua, tulouna Fuifatu, Vaituutuu ma Finao, Matia ma Matia Ituau ma Faletoi, aua le usoga a Pule. Tulouna Lalogafuafua, Malie ma Vaitoelau, tulouna oe Maauga ma Nuuausala, o lou malae e faitau i ai le usoga a Tumua, o malae o lo o faafalelemalu ai le aufaigaluega totofi a le Atua, o lo o latou punonou ma faoololomaau, faanonomanu ma

faatagitimu i le Atua ina ia toto faaua ifo manu a ia tafe tino i vai le tamaoiga, aua Samoa mo a taeao.

Tulou le faafofogaaga i Aiga ma Tama, o Tumua ma Pule, Ituau ma Alataua, Aiga i le Tai ma le Vaa o Fonoti, aemaise le faasau faafogafoga mai ia Sua ma le Vaifanua, o Fofu ma Aitulagi, Saole ma Saleaamua ma le Launiu na Saelua, le Laau na Amotasi, Tama a le Manuatele ma le Tootoo o le Faleula.

Se a se faafofogaaga a Maota e Lua o le faigamalo a Tutuila ma Manua. Afio le Peresetene ma le Maota o Senate, afio foi le Fofoga Fetalai ma le Maota o Sui. Ae le galo lava Afia i si ona vao. Se i ou see ane lava faapitovaa ane i ava ae ou aapa lava i puea ne i ota matele lava i le aapa ae galo ai le piitaga. E faigata ia te au Mataiva ma Tautai nai Maauga ma Nuuausala, na tu ai le tapaaui o le Alataua, o le malae o le vavau, o le malae o le fuafuaga. Ae popole ne i le asia lava Sagameauta na tausi ai le tama i toatamai le tamaitai na liaina lea o le taula o vai i tautulu i Vaialua i le tapuaiga mamala a si ou nuu ma le itumalo.

Oe Leulumoega, o le tausi Tumua, i le afio o le Afioga i le Tuiaana, afio Sooaemalaelagi ma alo o Tamaalelagi, alaalatai oe le Toaiva ma lau Fetalai Alipia o le Matuanatogi. Susu le Aiga Sa Tanuvasa o le Laau na Fausia na atoatoa ai upu o le itumalo. Afio foi le Aiga Sa Tuala ma le latou Tama, alaalatai oe le Faleaana o le Fale Tuiaana. Ae a lou nuu i Vaialua. Afio lau Afioga Tauti ma Malaitai, alaalatai oe le Faleaana i Gagae.

E le vaea lava le falaooto i le aufaigaluega totofi a le Atua i totonu o le itumalo. O la outou tapuaiga tatalo ma faaoololomaau i le ao ma le po aua se manuia o le tatou itumalo.

Faamalo faafetai le folau, o lea ua tatou tau manuia i le tau faaiuga o lenei aso. E ui lava i se vaivai ma se faatauvaa o le auauna, ou te lototele aua out e lagona le mafanafana o le agaga i la outou tatalo e pei o la Paulo. Out e mafaia mea uma i le faamalosi mai o Keriso ia te au. Tapuai maia Aana Nu.3 ae se i taumafai so tatou sao ia Manuvao. E fou le sui usufono i le Maota, e fou le tulai i le pau lea, e fou le valaauina ma le tofiga. O le a faapalepale mai se tala a le sui usufono. E fou le tofi ae le fou le faalogo. O lea la e tau fua sau tala ma ni ou manatu i lau faalogo.

Lau Afioga i le Fofoga Fetalai, lau Afioga i le Minisita o Tupe, e mafai ona ou faaupua le Tala o le Tupe, a faaletonu le pese ua faalefomu le teine. Fai mai taga ma aga o poula, e vavai ma onomea le tausala, pe a agatonu le pese. Ona ou faapea lea, lau Afioga e i le Minisita o Tupe, ua see matagofie le tatou Tala o le Tupe. Malo le tapena, malo le sauni. Ua le faaletonu le pese, ua logomalie le pese. Ua le fomu foi le saasaa a le tamaitai ae ua vavai ma onomea lana saasaa. Se i ou mulimuli i manaoga o le itumalo. Ae o le a avatu se motugaafa i le tapenaga ua i ai lenei as oi le Tala o le Tupe 2021/2022.

Lau Afioga i le Fofoga Fetalai, e tauala atu se lagona i lau Afioga i le Minisita o Aoga. O lea ua maua ua aapa lo outou aao ina ia faapena ona totogi faiaoga uma, faafetai o la outou pule lea. Na o nai fesili lava. Ua

aofia uma ai i i faiaoga o aoga faataitai? Ua aofia i i ma aoga o lo o fitoitonu mo le aoaoina o alo ma fanau o lo o i ai o latou manaoga faapitoa? O le malosiaga o le Matagaluega, o asiasi aoga. O le mamalu foi lea o le Matagaluega o asiasi aoga. O le limataumatau foi lea o le Matagaluega o asiasi aoga. O le ala lea e tau talosaga atu ai lau Afioga i le Minisita o Tupe ma lau Afioga i le Minisita o Aoga, ia toe faaopoopo a tatou asiasi aoga. O totogi o asiasi aoga o lo o maualuluga ai totogi o Pule Aoga. Ae i ai lou talitonuga, o i o le fatu lea ma le malosiaga lea aua o i o lo o feagai ma faiaoga ma Pule Aoga i aso uma aso uma. Ua maua i saunoaga o le taeao ma le aso ananafi ua laasia lo latou lagona i totogi o pili aoga o le NUS. O le faafesili ma le tatalo, afai ua le avagalima ma tagolima matua, o le a le isi laasaga? Ae lagona i le loto, a faataunuuna le polokalame foi lea e taua o le students loan scheme e tau faafaigofie ai tapenaga a matua aua alo ma fanau. O le tatalo lea.

Lau Afioga i le Fofoga Fetalai, lau Afioga i le Minisita o Faatoaga, malo fai o le faiva, e leai lava se mea sili ma le taua nai lo le oo i ai, tilotilo i ai, e pei ona matau i au asiasiga ma lau Afioga i le Minisita Lagolago. O le talosaga, o lea ua maua i le tatou Tala o le Tupe le faaaliga foi lea a le Ofisa o Faatoaga. A o le tatalo ma le talosaga, ae a pe a faatino i totonu o itumalo faapalota, e itiiti ai le lua silasila ma o i e mautinoa ma mautinoa lelei ai, o oloa tonu lava ia po o faaeleeleaga tonu lava ia a le nuu ma le afioaga. O le vaa tele lea e masani ai ona faatino, tatou te le mailoa. O nisi e leai ni faatoaga, a o lea ua faatau mai i i i le maketi ona avea lea ma latou meatotino. Ae pei e faapena se lagona. Atonu e aoga foi lea e faamalasia ma faatosina ai le aufaifaatoaga e gagauina le vao. O lea ua taua fanua o le Esetete Tausi o tuamaota ma tualaoa o le nuu lenei ua lalata lava i le falepuipui o lo o i Tanumalala. O fanua, o fanua o Nofolii. E tatalo ma le agaga faaaloalo, ua leai ni fanua ua utiuti le mea e galulue ai le afioaga ma le nuu, ae ua tatalo atu, to maia lea vaega e faatino ai le auaunaga ma le tautua.

Sa i ai tatou asiasi itumalo, leaga ou te taulalata i le mea e alaala ai le asiasi itumalo lea, ae ese lona taua. E taua i le a? E taua e te lua toomaga i ai i vaega o lo o faapena ona galueaiina i nuu ma afioaga. O le uiga la o lau faamatalaga, pe le ua toe alagatatau ona toe faamalasia ma toe faatuina le vaega lea ina ia mama le lua galuega i le taimi e tasi e faapena ona faataunuu ai ma atinae faatasi ai itumalo.

Lau Afioga i le Fofoga Fetalai, o nai vaega e fia tuutuu atu ai se tuualalo i le Afioga i le Minisita o le Soifua Maloloina. Malo faafetai. O oe le isi toa o le tatou galuega, aua e a? O lea lava ua e asia, ua e tuvae ma e tuaao i falemai taitasi. Pau lava o lea, e sau lava le ambulance mai Savaii kolopu i Leulumoega. Na o le 2 lava ambulance lea e i le Matagaluega i Motootua. Leaga o lea ou te vaai i ai. A o le va lea o Motootua ma Leulumoega, e alu atu le ambulance sau, alu atu, tai faafa ma faalima i le aso. O le lagona e taumolimoli atu, ua le o alagatatau ona i ai se isi a tatou taavale faapea mo Leulumoega, ina ia

faafaigofie ai foi le galuega o lo o taumolimoli mai Salafai. O le tatalo lea.

O le tatou falemai tele i Motootua, ua ou vaai tino i paelo la e tutu ai i totonu, ua ou vaai tino i le tutulu. Ia se i silasila ane ai lau Afioga. O falemai itumalo o lea ua maua o lea ua i ai le vaegatupe e faaleleia ai. Mo le falemai o Leulumoega lava ia, e le i mamao tele atu lona toe faaleleia, a o lea ua e silasila i ai, o lea foi ua ou vaai i ai. E mafua i se a? Leaga o la e lava ua toe fonofono. A na toe reshape toe restructure le toe faatulagaga ua fou. Leaga o i le falemai lona lua o Upolu. O i le taulaiga mai Salafai aemaise lenei faaitu. O le mea lea e tatalo atu ai i lau Afioga i le Minisita e fitoitonu i le Soifua Malolina, se i silasila ane i lea vaega. E oo lava i le nofoaga o lo o faapena ona api ai alii ma tamaitai fomaina, e faapena ona i ai se lagona.

Ua faaoo atu foi se talosaga i le gasegase o lenei itumalo, tulou le Maota, tulou le faafofogaaga. Ua faalua ona taoto ma ua i ai le fuafuaga e tataua ona avatu i fafo mo ona togafitiga. E tatalo atu ina ia e silasila ane i ai mo le faaleleia o le soifua manuia.

O lea ua oo foi le faasoaa aua le penefiti a tagatanuu o lo o i ai o latou manaoga faapitoa. O le fesili fia malamalama, faapefea le ua aafia i manaoga faapitoa ae ua ausia tausaga penisione, o fea le alavaa o le a alu i ai? Alavaa o le penisione po o alavaa o manaoga faapitoa po o le alu lua. O le faafesili lena ma le faaaloalo.

O fesoasoani mo le fausiaina o fale mo e lima vaivai ma lē tagolima. O le faafesili a le sui usufono, o le a se faiga faavae o le a limataitaiina ai le faasoosoa o lea vaegatupe? Aua o le mea moni, e tutusa uma tatou, e lima vaivai ma lē tagolima.

Lau Afioga i le Fofoga Fetalai ma le mamalu o le Maota, o le Matagaluega o Tupe. O lea ua e tu tonu lava i le fua e fai mai aua ne i e toe me i i luma e ala i tatou nogatupe, a o lea ua faaititia tupe aua auaunaga eseese. A o le fesili, e faapefea ona faatupe, e faapefea ona faatupe atinae tetele. O le fesili lea ma le agaga faaaloalo.

O le Matagaluega o Tagata Tafafao Maimoa Mai Fafo. E ui lava o lea e feagai tatou ma le faamai ua faapena ona leai ai ni tatou turisi e malaga mai fafo, ae talitonu i le taimi lenei, e tapena ai vaega ia, e tatala ane a ua mautu, historical sites po o vaega foi ia faaleaganuu, mataaga faaleaganuu. Ia i ai se fesoasoani tau tupe e faaolaola ma faaleleia ma tapue ai atinae. O i o le tosina mai lea o tatou tagata tafafao mai aua tatou tupe maua.

Lau Afioga i le Minisita o le Matagaluega o Leoleo, Falepuipui ma le Tinei Mu, faafetai i la outou galuega, faafetai i lo outou tiute, 24 itula o punouai pea, malutia ai le soifua ma le ola o Samoa atoa. Na o se talosaga. Fui Mu Apia, Fui Mu Vaitele, Fui Mu Malae Vaalele. E le mafai ona galo ia te au le aiga i lou tuaoi, vili mai le telefoni faailoa mai i ai le faalavelave, paga lea, e taunuu atu ua malala. E mafua i se a? E mamao. O le tatalo i lau Afioga i le Miinsita, pe le ua alagataua ona i ai se isi tatou ofisa o le Fui Mu ma taavale e taulalata atu i le itu Aana. A le o lea, o lea e i ai fanua o le Esetete Tausi e faafesagai ma le malae

vaalele. O Fui Mu po o taavale fui mu a le malae vaalele e le o mafai ona agai mai tua i o tatou aiga pe a oo ina agai mai se faalavelave. O le latou matafaoi, aua le tausiga o le filemu, aua le tausiga o le malae vaalele ma tatou vaalele. O lea e tatalo atu ai, e aoga foi lea o lea ua tatala ai a tatou tagata faigaluega mo lea Matagaluega.

O le Matagaluega o Fesootaiga lau Afioga i le Fofoga Fetalai. E fia malamalama lava le sui usufono o lo o talatalanoa atu i le SNBH, o fea le mea o lo o agai i ai? Fesootai ma le primary school net, fesootai ma le Matagaluega, a o maua mai ai ni tatou tupe? O le faafesili lea ma le agaga faaaloalo.

E taualuga se lagona i le Matagaluega o Galuega, lau Afioga i le Minisita o Galuega. O mea uma lava e sau mai le planning. A outou silasila i le tatou taulaga, e faata nei sua taeao, e faasima nei sua taeao. Aisea? E le o le planning? E le o le planning lea e faaletonu? O le a se itu lelei a o le a se itu e faalelelei ai le tatou smart meter? Ou te talanoa atu leaga o lea e le i oo tele atu i tua le faalauiloa lea ina ia oo atu a ua manino ma malamalama ni itu e lelei ai ma ni itu e faaletonu ai. O le agaga lea ma le faaaloalo i lau Afioga i le Miinsita o Galuega.

E taualuga la se lagona lau Afioga i le Fofoga Fetalai ma le mamalu o le Maota i manaoga o si ou itumalo. I lou pitonuu lea o Vaialua, na ona aualatele lava, aiga, sami loa le tuaoi lea ma Fasitoo seia agai atu i totonu. E tuafale i le sami. A oo ina siisii le tai, ua oo atu lava i fale. E tatalo atu i lau Afioga i le Minisita o Galuega mo lea vaega.

O auala galue. E 2 pamuvai, e le i oo i le isi pamuvai mulimuli ae muta ai loa i ina le ta. O aiga o lo o nonofo i uta i i, e 20 aiga ae o tagata o lea e i totonu o le aiga lea, e oo atu i le 50 e manaomia, leaga o lea e i ai tamaiti aoga, o lo o i ai le afaigaluega, o lo o i ai e matutua. A faaleleia auala nei, faafaigofie le feoaiga, e le gata i galuega a o aoga.

O le tausaga 2009 le Tsunami, 2010 taunuu mai le talosaga a Nofaalii i le Matagaluega, 2012 toe tuliloa mai le isi talosaga e oo mai lava i le aso lau Afioga i le Minisita e le i oo mai lava se tali. A o le tatalo lena, tusa lava pe le faataina, a ia tanu lelei le atu alavai ina ia faapena ona umi lona aoga. Toe pau lava lea o le nuu lau Afioga i le Minisita, toe pau lava lenei o le nuu e le i ati le latou auala i le auala kolosi lea e alu ane i Aleisa. Toe pau lava lenei o le nuu ae ou te le iloa le mafuaaga. O aiga ia ou te talanoa atu ai o lo o manaomia le suavai, o lo o manaomia foi le eletise. E tatalo atu i lau Afioga i le Minisita se i silasila ane i ai.

O si ou nuu i Leulumoega, ua matua malepelepe lava lo latou auala galue le auala lea e tau o le auala matatao. O lo o i ai foi nai aiga i uta i ina e le i oo i ai le eletise. O aiga la e i uta atu i Leulumoega uta, sau lava le vai mai tua i Gagaifo gata ia Frankie lea e i Tanumalala. Alu atu le vai lea e alu atu i Aleisa gata i Lepale i Fasitoo-uta. Le va lea o lo o i ai aiga ua matua manaomia le vai taumafa. Ona faasolo mai ai lea i lalo i le aega seia fesootai ma le paipa lea i i Nofaalii i Leulumoega, o le fesootaiga lena e faigofie ai la outou galuega. Ae i ai lou talitonuga lau Afioga i le Minisita, e talitonu lava Toma ina ua vaai. A e afio atu lau Afioga i le Minisita ona e talitonu lea i mafatiaga ma manaoga lea e i

ai. O le mea foi lea ou te tatalo atu ai, afio maia se i tatou savalivali se i e silasila i pagatia ma mafatiaga ma manaoga. Ua iu manaoga, taualuga si a matou talatalanoa atu.

Avea ia lenei avanoa taua lau Afioga i le Fofoga Fetalai se i e liliu ane lava i si o matou itumalo. Le paia aua le afio o Sooaemalelagi ma alo o Tamaalelagi, oe le Toaiva ma lau fetalai Alipia o le Matuanatogi. O la outou pule lea, o la outou faaaloalo lea. Faafetai, faafetai lo outou titi faitama. Sa Tanuvasa, Sa Tuala ma le mamalu i le Faleaana, Tauti ma Malaitai ma le Faleaana i gagae, o la outou pule lea. Na tatou taape ma le faanaunautai o ai lava le o le a tulai mai, o le tatou sui usufono lena. Faafetai mo la outou faaaloalo, ua inu malie le i le falesafune ae tofumalemo Tagaloaopo i la outou faaaloalo. E oo lava i aiga, o uo ma e masani o lo o taumamao mai, le mafutaga i Aukilani ma le mafutaga i Kuiniselani, aemaise le mafutaga o tama tuai o le Kolisi o Avele tausaga 1980 o lo o i Niu Sila ma Samoa nei, faafetai i la outou faaaloalo, o la outou pule lea.

Magalo se leo lau Afioga i le Fofoga Fetalai ma le mamalu o le Maota nei pe a fai ua sopoutu so matou leo ma sipa foi se lamaga i se matou lalafo, ma matou tatalo atu, foi maia ma faamagalo i matou.

Le tatou itumalo, malo tapuai ua manuia faiva o lenei aso ona o la outou tapuaiga. Manuia Ofisa Sili o Pulega o Matagaluega, o la outou pule lea. Manuia lau Afioga i le Failautusi ma le mamalu o le Ofisa o le Fono ae matou ola i le agalelei o le Atua. Soifua.

*Na faaalua le agaga fiafia o le Maota i le patipati o latou aao i le maea ai o le Saunoaga Faa-Taupou a le sui usufono mo Aana Alofi 3.*

**FOFOGA FETALAI:** Ua faamalo faafetai saunoa i lau Afioga i le sui usufono mo Aana Alofi Nu.3, lau Afioga Agaseata Valelio Tanuvasa Peto. Malo saunoa. E taua foi le tuualalo, aemaise foi o le auililiga ma asiasiga i nai aiga taitasi o lou itumalo aemaise foi le suavai taumafa i gauta o lou afioaga. O lea ua maua ma faafofoga le Afioga i le Minisita ma le Kapeneta, ia atonu o le a vave ona maua se tali. O le mea lea, ia faamalo faafetai mo le lauga.

O le taimi nei ua avanoa foi mo se tatou sui usufono e fia saunoa. Ia ua matau atu o lea ua sauni mai le sui usufono mo Faasaleleaga 1, lau Afioga Magele Sekati Fiaui. Ia o lou avanoa lea. Ma le agaga faaaloalo.

## SAUNOAGA FAA-TAUPOU

**Afioga MAGELE SEKATI FIAUI (Faasaleleaga 2):** Faafetai atu i lau Afioga i le Fofoga Fetalai. Sa ou manatu ua vela le fala. A na e saunoa mai lava e faamuta ai i i mo lenei aso, e ioe foi i ai se lagona. Ia, peitai ane e faigata o lo o tapuai ma faafogafoga mai si ou itumalo.

Ou te tulai lava i le migao tele e talisapaia le avanoa faaauuro ua maua e si ou itumalo e fai ai sona sao i le Tala Faatatau o le Tupe 2021/2022.



Lau Afioga i le Fofoga Fetalai, e 30 laupepa o lau lauga, ae le afaina e vave lava lau faitau.

Ou te manatu o lea ua tatou feiloai i magafetau soifua e pei o le upu i le tamaitai o Leutogitupaitea. Faafetai o lea sa e mua mea i Matautusa, ua maea ona e tapui le tapu a Tupo ma toto le niu i le tuaoi aua le sulaina o le alofa ma le agalelei o lo tatou Tama i le lagi i lo outou soifua ma se ola momoli mai i lenei aso aua le Fonousu mamalu a le Palemene o Samoa, ua tatou malaga faatasi ai i lou sa folau i le Atua i lenei aso ma le taeao ua tea. Ua ou manatua vave i lenei taimi le faafalelemalu o susuga i ao o faalupega o le atunuu, susuga i feagaiga tau i le lagi i so o se tafa o Samoa, o lo o tatalo i le ao ma le po, faanonomanu aua se manuia o Samoa. Faafetai tele i la outou galuega fai ua manuia ai aiga ma nuu, a ua oo mai lava i le aoatetele o Samoa ma lenei faigamalo.

E faafeiloai faapitoa atu le sui usufono o Faasaleleaga Nu.2 i a outou susuga i lenei afiafi. Lau Afioga i le Fofoga Fetalai, ou te talitonu o le a ou le toe saena le atonapona a le atunuu ou te manatu o lea ua uma ona saunoa ma fetalai le au tulatoa ma ponaoo. Ae tau ia ina ou faapai atu e faapea. Ua paia le tafaono o Samoa, ia Tumua ma Puleono i Salafai, Manono ma Apolima, Tutuila ma Manua, i Tama ma Aiga, o Aiga ma Tama, Tumua ma Pule, Ituau ma Alataua, Aiga i le Tai ma le Vaa o Fonoti, Faatuiolemotu ma le Faleagafulu, Tama a le Manuatele ma Tootoo o le Faleula. O paia na o Samoa e amata mai i le vasa i Saua seia paia le niuula o le Alataua. Ua paia ai nei le Maota i Tiafau, o le Maota ma le Malae o le faautugatagi a Samoa e vetevete ai upu ma apaapaloloa ai le tofama le faautaga a Samoa i upufai o lona Malo.

E faatalofa atu i lau Afioga i Le Ao Mamalu o le Malo ma lau Masiofo, faatalofa atu i lau Afioga i le Sui o le Fono a Sui Tofia ma lau Masiofo. Faatalofa atu i lau Afioga i le Faamasino Sili ma le Matagaluega o Faamasinoga. Lau Afioga i le Fofoga Fetalai, lau Afioga i le Palemia, eetai maia i ou seetaga malu lau Afioga i le Palemia Tamaitai muamua o le Malo Tutoatasi o Samoa, lau Afioga Fiamē Naomi Mataafa Faumuina Mulinuu II o oe o le Sao Faapito, o le Sao Papa, o le Sao o Falenaoti, o Tuiatua ma le Faleagafulu o ou alo, o le faauluuluga o le Aiga Salevalasi na mua i paia o Samoa. E te alaالاتا i Lotofaga, e te afio i le Maota i Mulifusi i le mea na lagomau ai le uluai tupu tamaitai na tafaifa o Salamasina faapea le vaataumualasi i Faigamalo le Aiga Sa Sitagata, le nofo a too ma lo oulua toalua Lemauga ma le Alii mauofaleupolu ma upu i le Faleatua. O oe lava o le Nafanua o tatou taimi aua ua e laveai ia Samoa. E le o se tala e aveane ai, leai, o lo o momoli mai alofaaga o lo'u itumalo i lau Afioga, sa matou feiloai anapo ma ananei foi i le taeao i le telefoni, faailoa ma saunoa mai, o lo o tapuaia ou faiva e lou aiga Salevalasi aemaise ou aiga tafaifa. O le latou tala, malo le toa, malo le to'a alualu ai lava i lau faatolotolo lena aua ne i toe suia.

Lau Afioga i le Fofoga Fetalai, ua mamalu mai lau Afioga i le Fofoga Fetalai o le Maota, lau Afioga Papalii aua le susu i Tapaau Faasisina i

le Malietoa na faalogo i ai Samoa. Lau Afioga Tooa o le Sao na Lua, le Aiga Sa Malietoa ma le alaalatai o Mago ma Luasiufanua ma Sapapalii. Ua faamalo le tau, faamalo le toa, ua faamalo fai o le faiva. O lau Afioga e matua i ai le tuu i sui usufono mamalu o le Palemene. Ia, ou te le selu atu, ae ua ese lava lou aulelei ma lou matautia mai luga i ina i lou Nofoa. Ia o lo o momoli mai foi alofaaga o lo'u itumalo i lau Afioga ma le latou faamalosiua i lau Afioga o lena foi e manaia lau faatolotolo. E sao ai le tala a tamaiti, ia on a oe uso. Ua vivii mai lau Afioga i le matagofie o lau Saunoaga Faataupou i le tatalaina o le Fono mamalu a le atunuu.

Ia, le maualuga o le Kapeneta i a outou Afioga i Minisita, tainane Sui Minisita, sui usufono o le Palemene mamalu o Samoa, ia o outou lava o lupe na faia mai i le fuifui e outou itumalo tutoatasi.

E faatalofa atu i le Sui Failautusi ma le Ofisa o le Fono, Ofisa Sili o Pulega o Matagaluega ua tatou faatasi i lenei lava aso. Se ua lelei le tatou aso, e pei o le fetalaiga ia Taua, aua o lele ua atoa tupe o le taulafoga a Tupuivao ma le alii o Luafanamaga i le Maota i Tiafau nei.

E faatalofa atu i si ou itumalo pele. Afai o outou silasila mai, e faatalofa atu i le itumalo pele Faasaleleaga Nu.2 e afua mai i Malaeloa seia paia Maota ma Fogatafua. Ia tau ia ina ou faapai atu i ou tulaga faalupea, i le susu o susuga i faafeagaiga ma outou faletua, afifio o aiga ma tapanuu, faleupolu o tofiga. O se taimi ona toe oo atu lea ma le agaga faaaloalo, ae se i ou liliu ane se i velo se aso aua se ta sao i le Tala Faatatau Autu o le Tupe ua i lumamea nei. Tapuai maia ma le manuia. Faatalofa atu i si ou itumalo o lo o faatasi mai i luga o upega o fesootaiga, ia tapuai maia ma le manuia.

Lau Afioga i le Minisita o Tupe lau Afioga Mulipola Anarosa, ua malo le toa, malo le fai o le faiva. Amuia oe ua tusia lou suafa i le talafaasolopito o le uluai Minisita tamaitai o Tupe talu ona faavae mai le Palemene o Samoa. Faafetai mo le Tala Faatatau o Tupe mo lenei tausaga ua tatou savalia, ua leai lava se vaipanoa e le i oo i ai lau faasoa. O le matau a lou itumalo, o lea ua tafe mai lava i luga le manuia tau lava i lalo i o tatou tagata limavaivai ma le le tagolima.

Lau Afioga i le Fofoga Fetalai, lau Afioga i le Minisita o Tupe, o nai vaega nei e poupu ai lou sa folau aua le lufilufiina o le tatou paketi ua lelei tapena. O le tala a lou itumalo, faatoa latou faalogo lava lea i se Tala o Tupe ua manino ma maioio lelei.

O le tulaga i le eletise ma le suavai, faafetai o lea ua maua le pau e 20% i lea auunaga, ae pau lava le tatalo, pei lava ua mamao tele Novema, ae o le a le mea e le tuutuu laitiiti mai ai i luma i le faaiuga o lenei masina po o le amataga o Oketopa e amata ai.

Ia, o le isi vaega lau Afioga i le Fofoga Fetalai, lau Afioga i le Minisita o Tupe, se i silasila ane i le tatou tusigaigoa foi lele sa fai lea sa totogi ai le tai \$50 po o fea ua fai i ai lena tusigaigoa aemaise o le National ID.

O le isi vaega, o le aitalafu lea e \$1 piliona. Ta te fia malamalama i aiaiga ma tuutuuga o lena aitalafu ae pe faapefea foi ona totogi, ae pe mafai foi ona totogi.

O se isi vaega lau Afioga, o le tulaga lea i le property gap foi lele o i latou e maualuluga totogi ma... e matauina foi lea i totogi o tatou tagata faigaluega, o le agaga o lenei itumalo, o le a le mea e le sii ai i luga i le \$5 le totogi o tatou tagata faigaluega. O le mea lea e matauina, e tutusa lava le tax lea e tipi a le tagata e \$200,000 i le \$300,000 lona totogi ma le sikulaki foi lele la e faigaluega. O se tuualalo, a faapea e tele e \$300,000 ona totogi, e tatau foi ona feoloolo, ae o le tagata lea e laitiiti lona pay na o le \$10,000 i le taulaga, ia faalaitiiti foi lana tax ia fesoasoani ai i le tulaga lea. O le isi vaega ia tagai ane pe mafai ona fai se tax return ma tulaga faapena.

Faafetai mo le \$2 miliona lea ua fesoasoani ai i nai aiga lima vaivai. Lau Afioga i le Minisita o le Siosiomaga, o le siisii o le tai. E talitonu lava e siisii lava le tai, o lea o le a siisii lava agai i luma. Ia e tilotilo lava i le isi 50 tausaga e faapena, o le a faaletonu nofoaga ia mo nai o tatou tagata ia, po o i ai se fuafuaga a le tatou Matagaluega foi lele to raise awareness mo nai o tatou tagata o lo o alaala ma papaaao i nofoaga nei, e faailoa i ai tulaga ogaoga o vaega nei.

Lau Afioga i le Fofoga Fetalai, i lau Afioga i le Minisita mo Faatoaga ma Faigafaiva, ou te talitonu pe a matau i le ata lautele o le tulaga o le faigamalo, e pei o le Matagaluega lea o lo o taoto i ai le aumaia i luga ma le toe siitia o le tamaoaiga o le tatou atunuu. Faafetai i lau Afioga.

O nai vaega mo lau Afioga ma le faaaloalo o uafu foi ia mo alia fagota. Na maua i se tasi o faifaiva, e \$50 ma ona tupu afe se seleni sa faapea mo le fausiga o lona uafu, ae e tagai i ai lau Afioga i le uafu, e talitonu lava e le... ailoga lava e atoa se \$10,000 na alu ai i le uafu, e manaomia lava. Se i silasila ane i lea vaega.

Ia, o le isi vaega lau Afioga, o le vaega lea mo falelaau foi ia mo itumalo. O le isi lea vaega e taua tele mo le aufaifaatoaga e tau malaga mai lava nisi mai tua i Salelologa, ae a leai e sau i inei i Upolu i Nuu ma e manaia ae faatino lea lava auunaga mo tatou faifaatoaga.

O lau Afioga i le Fofoga Fetalai, o nisi o vaega i le Minisita lava o Faatoaga, o le tulaga lea i fesoasoani mo le aufaifaatoaga, nisi auala e ese mai le SAFPROM foi lele e fesoasoani i nai o tatou faifaatoaga. O lea e matauina ua fai si umi ona aumai o talosaga a faifaatoaga a si ou itumalo e le i maua lava se tali.

Ia, lau Afioga i le Fofoga Fetalai, ia, i lau Afioga i le Miinsita o le Soifua Maloloina, o nai vaega e i ai le agaga o lenei itumalo e pei foi le tulaga lea o mai faavavave po o emergency. O le a le mea e le fai ai se tatou helicopter mai le motu tele i Salafai mo tulaga ia. O le isi vaega, o le improve foi lea mo customer service training pe mafai ona tagai ane i ai.

O le isi vaega o taumafa mo gasegase i le falemai o Tuasivi, po o le a se tulaga o i ai lea vaega. Ia, e manaomia ni tatou fomai faapitoa. E le gagavale i fomai, ae i ai le agaga foi lele, o le fomai lava e faia tamaiti,

o le fomai foi lena e vaai tagata matutua ma tulaga faapena. A maua ni nai fomai foi lea faapitoa lava mo tamaiti, ia fomai faapitoa mo tina ma tamaitai, faapena foi le tulaga eseese e manaomia ai le latou fesoasoaniga.

Lau Afioga i le Fofoga Fetalai, ia, lau Afioga i le Minisita o Leoleo, o le process foi lea, se i tagai ane faamolemole i le process mo le mauaina o laisene avetaavale. E matauina e ese le aso e faatumu ai le form ese le aso e fai ai le suega ma le aoaoga, ese le aso e fai ai le driving test ma tulaga faapena, ese foi le aso e totogi ai mo Salafai, e fai lava si faigata. Afai e malaga mamao mai, e tasi le aso toe alu toe sau. E tasi le aso ae \$20 le return bus fare. Ia a silasila la i ai, i aso ia e fa, e \$60 le tau faaopoopo e le manaomia mo nai o tatou tagata ia, ae pe le mafai ona fai i se aso se tasi vaega ia, aua e mautinoa lava e faatali foi e alu atu le tagata i le isi aso e piki mai le Id pe a uma ona faatino.

O le tulaga i le pasiga o tatou taavale, mo le pasiga o tatou taavale, o lea e i ai le tulafono e faapea e tatau ona 10 taavale faatoa mafai ona pasi. Ae silasila ane i ai pe mafai ona toe tuutuu ane i lalo i le 6 po o le 5 taavale ma tulaga faapena.

Lau Afioga i le Fofoga Fetalai, ona oo mai lea i nai vaega ia mo si ou itumalo, lau Afioga i le Fofoga Fetalai, i lau Afioga i le Minisita mo Galuega, Felauaiga ma Atinae Eseese, o matou auala galue e manaomia ona faatino. E pei lava foi ona matau o lea ua fai atu le augatupulaga foi lele sa savavali. O lea ua i ai le talutalufou ma le tupulaga, na ona oso lava i le taavale alu i uta. A faaletonu la le auala, e le mafai foi ona o i uta e faatino le faatoaga, ae o le lelei o le auala, e mafai e le aiga foi lele e leai se taavale ona totogi le taxi e alu ai i uta e fai le galuega, ia toe valaau mai lea i le taxi e alu atu i uta e toe piki mai pe a uma. Ia, e faapena le tilotilo i ai mo nei vaega.

Lau Afioga e i ai le talosaga a si ou nuu o Safua sa faaoo ane i Salafai i se patupatu e fia fai i ina i Safua i luma ane o le faleoloa lena Saina e i ina faamolemole lau Afioga ona o le matauina ina ua faatu le pisinisi lea, ua tele le traffic e ono lamatia ai le soifua o alo ma fanau i le taeao. Ia, se i tagai ane faamolemole i se taligalu i ina i Salelavalutai. O le tulaga siisii o le tau e matauina lava le lamatia o nai aiga i ina faamolemole lau Afioga.

Ia, o isi vaega e fia oo i ai se lagona, o le Tulafono foi lea o le aso Sapatu lau Afioga i le Fofoga Fetalai, e taua foi le vaega lea i lou sui usufono aemaise foi o lou itumalo. O se tasi lea o vaega o le a fesoasoani ai i le human development aemaise lava o faataitaiga mo le autalavou. Se i silasila ane i le vaega lea i le Tulafono lea o le faamamaluina o le aso Sapatu. E i ai le talitonuga o lou sui usufono, a malosi lou faaleagaga, e manuia foi lou soifua faaletino, ma tulaga ia o Tulafono e 3 ia sa pasia talu ai. Faamolemole po o le a se tulaga o i ai le vaega lea pei ona outou finau mai ina ia toe faafoi e toe faalelei atili nai vaega ia.

Ia le paia e o lau Afioga i le Fofoga Fetalai ma le mamalu o le Maota, o le a foi se tala a Magele i lenei vaega o le aso, ae ou te fia oo atu i si

ou itumalo. Le paia o le aufaigaluega tofofi a le Atua o la outou faanonogamanu ua ae ai i fanua le faatamasoaliiga a le itumalo e ala i la outou faiga filifiliga ua ou seei ai i le nofoa o lo ta itumalo. Faafetai tele. Faafetai tatalo.

I le afio o le Aiga Salevalasi i ona ituvai na lua, afio lau Afioga i le Tootoalii, lau Afioga Tofilau ma lo outou Matua, alaatai lau fetalai Leauanae ma Sasulu. Susu Sua o le Maopu o Nafanua, susu Sualii o le fofoga o le Aiga Sa Sua, afio Tusani ma le Aiga Sa Tusani, afio le Tau Maopu ma le Taofia, malii mai Leitualasa ma Saveama ma le mamalu ia Sasilafaiga.

Afio Tapaau ma Alo o le Tagaloa, alaatai fesaesaeai ma fataloto, malii mai Moemai ma Lealiiiee ma le mamalu ia Safune ma Taulauniu ma faleupolu o tofiga. Afio Alo o Tuiaana Tamaalelagi, afio le Muliagatele ma le Toainafo, alaatai Fuga ma Mauga, ma le mamalu ia Salemuliaga.

Afio lau Afioga i le Tamaitai Gatoloaifaana ma le falefa o alo o Atiulagi, susu Taito ma usoalii ma le latou matua, mamalu ia Safuamua ma le nofo a ituaiga.

Ia, si ou nuu o Safua, susu le Gafa ia Soanai ma Patane, susu usoalii faafeagai o le Malietoa, afio aiga, alaatai lau fetalai Tevaga o le tapaau fanua ma le mamalu i le faleono.

Faafetai i sui tauva, faafetai taalo faatausala, malo malolo faatamalii. Faafetai faapitoa i le tamaitai i le Afioga ia Gatoloaifaana, faafetai i lou sao taua i le ta itumalo.

Lou itumalo pele, e uma le aso lenei i faafetai e le lanu e le lilo lou alofa ma lo outou agalelei. Ae ou te fia saafi i saafiafiaga a Mona le perofeta ua faapea mai, e, ua tusa au nei ma le leai, o lou malosi foi ua ou vaivai ai, e leai se poto, e leai se agavaa. Ae fai mai le afioaga paia a le Atua, o le matau i le Atua o le amataga lea o le poto. O le poto, o le mea lea a le Atua, ma o le finagalo alofa o le Atua e faaalii i tama valevale e pei ona molimau mai ai ana Afioga Paia.

Lou itumalo, e ofo atu lou ola e tautua mo oe. Ave lou ola e osi ai le taulaga aua se manuia o tupulaga lalovaoa, aemaise o outou fanau mo nei ma a taeao. Soifua ma ia manuia.

*Na faaalii le agaga fiafia o le Maota i le patipati o latou aao i le maea ai o le Saunoaga Faa-Taupou a le sui usufono mo Faasaleleaga 2.*

**FOFOGA FETALAI:** Malo faafetai saunoa i lau Afioga i le sui usufono mamalu mai i Faasaleleaga Nu.2. Magele. Faafetai foi mo lou faasoa mai aemaise ia le lufilufiina o le tamaoiga o le atunuu. Malo faafetai malo mo le tapenaga aemaise foi o manaoga o si ou itumalo, ia o lea lava ua faafofoga ma le totoa ia le Afioga i le Palemia ma le Kapeneta, ia aua lava se fesoasoani mo lou itumalo. Faamalo faafetai.

Ia o lea e matau atu toe 15 minute tatou malolo. Ia e manatu foi e matau atu e pei e toe toatasi le tatou sui usufono, ia e toe o le sui

usufono mai i Aana Alofi Nu.4. Ia ou te talitonu e tasi lea sui usufono e fai mea vave. Ia o le mea lea ia tuu atu le avanoa, ia tasi lea sui usufono matua o le tatou Palemene. Lau Afioga Toeolesulusulu ia sui usufono mamalu mai ia Aana Alofi Nu.4. Ia ona talafeagai foi lea o le tatou ala usu a taeao aua se tali a le Palemia ma le Kapeneta ma le agaga faaaloalo.

## SAUNOAGA FAA-TAUPOU

**Afioga TOEOLESULUSULU CEDRIC POSE SALESA SCHUSTER (Aana Alofi Nu.4):** Faafetai i lau Afioga i le Fofoga Fetalai mo le avanoa, e 40 foi pepa o lau lauga ae lea o le a tasi lea o le a faitau.

Lau Afioga i le Fofoga Fetalai, o le viiga o le Atua e tumau lava i le loto, ona o lana pule mamalu ua laveaiina ai le soifua o lau Afioga i le too taumua o le Maota i Tiafau, tainane le faalepa o le vaatele i le mamalu o le paia tele ua ee ma papaaao i le Maota o Samoa. Ae ou te le i soaia la le moa o le afi o muloa nai i le atu Sasae, e muamua ona ou togi le autesa i fanua, ae faapoi le punavavalo ne i mea ane ua alatafai lea aitutautali, ona saluu lea o le efu vali ma toto ifo i le fale nei. Mua ia ina mua, mua o.

Lau Afioga i le Fofoga o le Fono, ou te manatu o lou loto o le tofa foi lea i lau Afioga, aua ua le o ni fuaga ua motusia, po o ni sa avea. O paia ma mamalu o Samoa e tumau lava. Ae se i ou muai ta le pola taliua, aua afaigaluega filifilia a le Atua, i fata faitaulaga e fia, sa o latou tuitui le lagi, ma punonou i le ao ma le po, ma tatalo i le Atua o Samoa ma le lalolagi atoa, ina ia auomanu lenei faamoemoe taua.

Ou te faapea atu ai i le ava ma le migao tele, tulou, tulou, tulouna lava. Tulouna ia i le ee faafogafoga a lau Afioga i le Ao o le Malo ma lou faletua, afio foi lau Afioga i le Sui o le Fono Tofia ma lou faletua. O le faafeagaiga o segaula i le va fefaatauagai a le Malo aua le nofoia o le Nofoa o lau Afioga i le uluai Palemia tamaitai o Samoa. O lea foi ua alaala ia le ausee matafala o le Maota o Samoa, le afifio o Afioga i Minisita ma le fale na sema i Afioga i Minisita Lagolago. Ua faatauata nei fetu o le taeao, i le afifio o Faauluuluga o Matagaluega e fia o lo tatou Malo.

E le faagaloina foi le taofi i le Faigamalo a Tutuila ma Manua, le afio o lau Afioga i le Kovana Sili ma le Lutena Kovana, le tafatolu o lau Faigamalo, le Peresetene o luga ma le Fofoga Fetalai o le Maota, o sui o le Paia o le Faleagafulu ma le Manuatele.

Lau Afioga i le Fofoga Fetalai, e fia afea foi le Vai o Sina i si ou itumalo, o Aana Alofi Nu.4. mai i le Fogailefatu e alaatai ai le Falefitu ma le Falefasitoo. Afifio ai le paia o le Aiga Taulagi, Afio ai le Maopu o le Tuiaana, faapea Malaetia e nofo ai le Talimatasi ma le Ituaiga ma le Faleaana. Afifio ai Aiga, Alo o Tamaalelagi ma le tamaitai tasi o Aana seia paia faletasi e alaatai ai le Laau na fausia ma

le mamalu o le Faleaana, Afio ai le Saoalii, o le Matua o Tofiga a Satuala ma le mamalu o le Aiga Satuala. E faatalofa foi ma faatulou i saoa ma tamaitai, faletua ma tausii aemaise le malosii o si ou itumalo.

Lau Afioga i le Fofoga Fetalai, ua maea atuvasa ma ona fesouaiga sa feagai ai i le faiga filifiliga a le atunuu. O lenei ua topule ia lo tatou Tapaau i le lagi, ma ua filifilia le vaega faaupufai Faatuatua i le Atua Samoa ua Tasi, e taitaiina lo tatou atunuu i lenei 5 tausaga. Ua afea foi le faaalooalo a Aana Alofi Nu.4 si mogamoga apaaugau o Toeolesulusulu e momoliina lo outou finagalo i le malae o le faautugatagi, o lo o lufilufi ai le tamaoaiga, ma faatonutonu folau ai, le sa o Samoa mo lenei 5 tausaga. Lau pule lea, o le a ou galue ina ia to manu mo si o tatou itumalo, aemaise Samoa atoa. Ia ee maia laia i le tumutumu o le fale selau, paia e le vaea ma mamalu e le aveesea o lo tatou itumalo, ae se i puai so tatou sao aua le taulafoga a Samoa.

Lau Afioga i le Fofoga Fetalai, taoto ia le vasa lautele o le a le saasaaina i tua le ava a Faleata, ae sunui tonu le alafua, aua le taotoga o iasa, e tusa o le Tala o le Tupe ua folasia i le Maota. E muai faaali le agaga o le faafetai i lau Afioga i le Fofoga Fetalai i le Palemia ma le vasega o le Kapeneta, faapea le aiga o le Faatuatua i le Atua Samoa ua Tasi, e tauala atu i le Afioga i le Minisita o Tupe mo lau folasaga. Ua o se fisaga agi malie i le faalogo ma le fiafia ua amatalia ma le faatino o nisi o vaega o la tatou anavatau, faapea auga taua sa o tatou militino, ma faasoa ai ma le atunuu ao loma le filifiliga. Malo toa, malo le fai o le faiva.

Lau Afioga i le Fofoga Fetalai, e fia faaalua se lagona o le fiafia ona o le faamuamua ma le faamamafa o le folasaga a le Minisita i le toe timaiga lea o upega fagota a Samoa, aua le faasoasoina lelei o seleni. E ui lava ina utiuti ma faatauavaa ae tele manaoga ma aitalafu tau totogi. A o taotaotua mai ai foi mala faalenatura, faamai aemaise aafiaga o le tamaoaiga o le lalolagi atoa. Faamalo i lau Afioga i le Minisita o Tupe, ua e le vaai pitotasi i le Malo ma ana galuega, ae ua e silasila alofa ma siitia le faasoa mo Faalapotopotoga Tumaoti, o lo o galulue punouai mo le faatinoina o nisi o matafaioi taua aua le soifua manuia o Samoa. Ua e lufilufi ma alofagia foi le pitolaau a tagata faipisinisi o lo o avea ma toomaga o le lautele o le atunuu, e ala ia i kamupani ma Ofisa faigaluega, ae ua oia ona o le Koviti-19.

Faafetai foi, o lo o mafai ona faaleleia auunaga faaauau a le Malo e faapei o Aoaoga, Soifua Maloloina aemaise le Vasega o Pulega lelei, itutino uma o le Malo. Faamalo le silasila mamao e amatalia nisi o fuafuaga taua mo le faatuputeleina o galuega, pisinisi faapea ma tupe maua e ala lea i vaega e faapei o le fale Export Authority, ma tapena fale gaosi oloa e faaogaina ina ia tele, ia tele o fua o faatoaga leaga.

E faapitoa le faafetai ua siitia e faasoa mo taaloga, aemaise lava i le itu o koleniga ma tapenaga a tama ma teine taaalo, ona e maualuga le talitonuga o lenei sui usufono, o se tasi lenei o atinae fetauti lelei ma tagata Samoa. Ma e tele se tamaoaiga ma galuega e maua ai pe ana lelei le faapolokalameina i tausaga ua mavae.

Faamalo le silasila alofa i le atunuu, ua faataoto vaegatupe e faatino ai nisi o suesuega i le Paeaiga ua mavae e nisi o sui usufono, aemaise o le lavalao o le atunuu e uiga lea i tupe faaalu sese, konekarate e le faavaea, aemaise o Tulafono e le fuafua lelei, faapea ai foi le toe iloiloia lea o le Faavae o Samoa. Talitonu ua lata le taimi e uma ai ia le tatou galuega, ae o le tele o nisi mataupu...

**FOFOGA FETALAI:** Ia ou te iloa o lena o le a uma mai lau saunoaga pe a uma ona faitau au pepa na e totoe, uma loa lea o lau... saunoa ma faamaea mai ia lau saunoaga.

**Afioga TOEOLESULUSULU CEDRIC POSE SALESA SCHUSTER:** Lau Afioga i le Fofoga Fetalai, e momoli le faamalo i le Afioga i le Minisita o Tupe ma le Kapeneta i le mataala. Ua vaaia lou naunautaiga mo le faalauteleina o alamanuia o le atunuu, ina ia tuu le faalagolago o le tamaoaiga o le atunuu i se atinae e tasi pe lua e faapei o faatoaga ma faigafaiva.

E talitonu foi, o nisi vaega taua o le anavatau o le Faatuatua i le Atua ua Tasi, e le i mafai ona faatinoina i lenei Tala o le Tupe ae o lo o fuafua e faatinoina i isi tausaga o lenei Nofoaiga. E aofia ai le faataua o nisi taleni ina ia mafai ona siitia le tomai o lo tatou atunuu ma tupe maua.

Lau Afioga i le Fofoga Fetalai, lagona foi le agaga fiafia ona ua lo o vaavaai atu sulu o le tino, ua faatino lo tatou faanaunautaiga o lo tatou vaega faaupufai faasafua lea o le tamaoaiga o le atunuu i afioaga o le itumalo.

**FOFOGA FETALAI:** Ou te vaelupeina le saunoaga a le sui usufono mamalu, ou te talitonu foi o lea ua oo mai i lo tatou taimi malolo e tusa ai o le lafo ua faamaonia. Ia ua maua foi lea laolao e faufau ai nisi vaega o lau saunoaga. Tatou tala soifua ia i le alofa o le Atua a taeao, ia ona toe faaauau lea o lau saunoaga.

Ia o lenei taimi e momoli le faafetai ma le faamalo i le maualuga o le Maota, i le Afio o lau Afioga i le Palemia, lau Afioga i le Sui Palemia, afifio Minisita o le Kapeneta, faamalo le usufono. Matau lava ma le totoe, ua iu lava lenei aso o lo o mau pea le toovae ma le onosai ona o lo tou manatu i le valaauina ma le tapuaiga a Samoa.

E fia faafetaia foi lea itu i le paia o le Maota, i le afifio o afioga i Minisita Lagolago, ae a lau Afioga i le Sui Fofoga Fetalai, aemaise o sui usufono mamalu sa sausaunoa i lenei aso. Ua faafofoga le Maota ma Samoa, ae a le tapuaiga a itumalo i a outou saunoaga i lenei aso. Malo saunoa faafetai tapena.

E fia afea foi se faafetai i le Ao mamalu o le Malo ma le masiofo, Sui o le Fono a Sui Tofia ma le faletua, Faamasino Sili ma le mamalu o le Faamasinoga, Taitai o Ekalesia Kerisiano uma i Samoa ma le aufaigaluega faauuina o le Talalelei. O paia faaleaganuu ia Samoa aaoa, ua faamalo faafetai i la outou tapuaiga. Ua iu ma le manuia le Fonotaga



a lau Palemene i lenei aso, ona o le mana o la outou tatalo ma la outou tapuaiga.

Faamagalo se aleu o lau Palemene pe afai ua sipa se lamaga ao faagasolo ana taualumaga, a le Palemene i lau tofa faatupu. Le paia e o le Palemene, afai ua i ai se gagana ua le tautamalii i lenei aso, ia ala ia i le tua e pei o le upu i le itulagi, tatou talosia ia le alofa o le Atua i le aso a taeao, momoli atu i ai lo outou soifua ma so matou ola, toe faaauau ai ia le tatou galuega.

Momoli le agaga faafetai i le auunaga a le Komesina o Leoleo ma le Matagaluega o Leoleo, ia le leoleoina aua le saogalemu o le Fonotaga ma le tatou Palemene, ia momoli foi le faafetai i le 2AP ma le Matagaluega o le Soifua Maloloina, ia faamanuia le Atua i la outou tautua. Alofagia e le Atua le afifio atu o le Palemene i lenei afiafi.

Ia, ae tatou te le i tolopo, ou te talosaga atu i lau Afioga i le sui usufono mamalu o Vaisigano Nu.1. mo se tatalo e faaiu ai le tatou Fono ma le faaaloalo.

***Na tolopo Galuega a le Fono Aoaofaitulafono i le itula e 6:03 i le afiafi seia aulia le itula e 9:30 i le taeao o le Aso Faraile, 17 Setema 2021.***